

[DA 1]

FILIDH NAM BEANN:

<eng>THE MOUNTAIN SONGSTER.

THE CHOICEST COLLECTION OF ORIGINAL AND
SELECTED GÆLIC SONGS NOW KNOWN.<gai>

“An t-òranaiche sunndach, ceòlmhor,
Dh’ fhógras bròn, ’s a dhùisgeas fonn.”

<eng>GLASGOW:

WAITT & STEWART, 76 QUEEN STREET.

[ENTERED IN STATIONERS’ HALL.]<gai>

[DA 2]

[Blank]

[DA 3-4]

CLAR-INNSE.

[TD 1]

FILIDH NAM BEANN.

ORAN DO CHEILE NUADH PHOSDA.

Le D. B. Mac-an-t-Saoir.

A Mhàiri bhàn òg ’s tu ’n òigh th’ air m’ aire
Ri m’ bheò bhi far am bith’nn fhéin;
O ’n fhuair mi ort còir cho mòr ’s bu mhaith leam,
Le pòsadh ceangailt’ o ’n chléir;
Le cumhnantan teann, ’s le banntaibh daingean,
Le snaom a dh’fhanas, ’s nach tréig:
’S e t’ fhaotainn air làimh le gràdh gach caraid
’Rinn slàinte maireann a’m chré.

’N uair bha mi gu tinn ’s mi’n cinnseal leannain,
Gun chinnt co ’theannadh rium fhéin,
’S ann chunna’ mi ’n òigh aig bòrd tigh-leanna,
’S bu mhòthar, ceanalt’ a beus;
Tharruing mi suas rith’ ’s fhuair mi gealladh
O’n ghrugaich bhanaibh bhi’m réir;
’S mise bha aobhach t’ fhaotainn mar rium,
’S crodh-laoigh a’ Bharain a’d’ dhéigh.

Maduinn Di-luain, ge buan an t-slighe,
'N uair ghluais mi, ruithinn mar ghaoth,
A dh'fhaicinn mo luaidh, 's rud uainn 'n ar dithis
Nach dual da rithis gu'n sgaoil:
Thug mi i 'n uaigneas uair a bhruidhinn,
'S ann fhuair an nighean mo ghaol;
A's chluinneadh mo chluas an fhuaim a bhitheadh
Aig luath's mo chridhe ri m' thaobh.

[TD 2]

'Sin 'n uair 'chuir Cupid 'n t-uldach a'm' bhroilleach
D'a shaighdean corranach, caol,
A dhrùigh air mo chuislean, chuir luchd air mo cholum
Leis 'n do thuit mi ge b'oil leam 's gu'n d' aom:
Dh'innis mi 'n sgeul do'n té rinn m' acain,
Nach léigh a chaisgeadh mo ghaid;
'S e leighis gach creuchd i féin le 'feartan
Theachd réidh a'm' ghlacaih mar shaoil.

Bheirinn mo phòg do'n òg mhnaoi shomalt'
A dh' fhàs gu boinneanta, caoin,
Gu mìleant, còmhnard, seòcail, foinnidh,
Do chòmhradh gheibh mi gu saor:
Tha mi air sheòl gu leòir a'd' chomain
A' bhòid 's a chuir thu gu faoin
Do m' smaointean gòrach pròis nam boireannach,
'S còir dhomh fuireach le h-aon.

Chaidh mi do'n choill' an robh croinn a's gallain,
'Bu bhoisgeil sealladh mu'n cuairt,
'S bha miann mo shùl do dh' fhiùran barraicht'
An dlùthas nam meanganan suas;
Geug fo bhlàth o bàrr gu talamh,
A lub mi farasda nuas,
Bu duilich do chàch gu bràch a gearradh
'S e'n dàn domh 'm faillean a bhuain.

Shuidhich mi lìon air fìor-uisg tana,
'S mi 'strìth g'a tharruinn air bruaich,
'S thug mi le sgrìob air tìr a' ghealag,
'S a lìth mar eal' air a' chuan:
'S toilicht' a dh' fhàg e 'n là sin m' aigne
An roinn a bh' agam 's an uair;
B'e coimeas mo cheud-ghràidh reul na maidne,
Mo chéile cadail 's mo luaidh.

'S e b' fhasan leat riamh bhi ciallach, banail,
Ri gnìomh, 's ri ceanaì mna-uails';
Gu pàirteach, bàigheal, blàth gun choire,
Gun ghiamh, gun ghainne, gun chruas;

[TD 3]

Gu déirceach, daonntach, faoilidh, farasd'
Ri daoine fanna, bochd, truagh;
Is tha mi, le d' sheòl, 'an dòchas ro-mhaith
Gur lòn do t'anam do dhuais.

Chuir mi air thùs ort iùl a's aithne
Le sùgradh ceanalta, suairc';
'N uair theannain riut dlùth bu chùbhraidh' t' anail
Na ùbhlàn meala 'g am buain:
Cha bhitheadh sgeul rùin a b'iùl dhomh aithris
A b' fhiù nach mealladh i uam;
Na'n cuiradh i cùl rium 's diùltadh baileach
Bu chùis dhomh anart a's uaigh.

Do bhriodal blàth, 's do mhànràn milis,
Do nàdur grinnis gach uair,
Gu beulchair, gàireach, àluinn, coimhneil,
Gun chàs a thoilleadh dhuit fuath;
Chuir i guin bàis fad ràith' am mhuineal
Dh' fhàg làn mi 'mhulad 's do ghruaim,
'N uair thuig i mar bha, 'sa thàr mi 'n ulaidh
Ghrad spàrr i 'n cunnart fad uam.

'S ann thog i mi 'm prìs o'n tìm so'n uiridh
An nì 's an urrainn a fhuair,
Sguab do'n ìre fhior-ghlan chruinneachd,
An sìol is urramaich' buaidh:
'Sin na chuir mi cho rìomhach umad,
Bha t' inntinn bunailteach, buan;
Lìonadh do sgiamhachd miann gach duine
An dreach, fiamh, an cumachd, 's an snuadh.

Do chuach-fhalt bàn air fàs cho barrail,
'S a bhàrr làn chamag a's dhual;
T' aghaidh ghlan, mhàlda, nàrach, bhanail,
Do dhà chaol mhala gun ghruaim:
Sùil ghorm lìontach, mhìn-ros, mheallach,
Gun dìth 'cur fol' ann ad' ghruaidh,
Deud gheal ìobhraidh, dhìonach, dhaingean,
Beul mìn nach canadh ach stuaim.

[TD 4]

Shiubhladh tu fàsach àirdh glinne
'S an àit' an cinneadh an spréidh,
'G am bleathan mu chrò, 's bhi chòir na h-innis,
Laoigh òg a' mireadh 's a' leum;
Cha mhiosa do làmh 's tu làimh ri coinneil,
N'an seòmar soilleir ri gréin,
A' fuaidheal, 's a' faidhmeadh bhann a's phionar
'An àm chur grinnis air ghréis.

Do chneas mar an éiteag, glé ghlan, fallan,
Corp seang mar chanach an t-sléibh;
Do bhràighe cho mhìn, 's do chìochan corrach,
'S iad lìontach, soluis le chéil';
Gàirdean tlà, geal làmh na h-ainnir,
Caol mheòir, glac thana, bas réidh;
Calpa deas ùr, troidh dhlùth 'm bròig chuimir
Is lùghor, innealta ceum.

'S ann fhuair mi bhean chaoìn aig taobh Mam-charai,
'S a gaol ga m' mhealladh o m' chéill;
Bha 'cridhe dhomh saor, 'nuair dh'fhaod mi tharruinn
Cha b' fhaoin dhomh 'bharaill bhi 'd' rèir:
'S ioma fuil uasal, uaibhreach, fharumach
Suas ri d' cheann-aghaidh fhéin,
Ga d' chmuail 'am prìs an Rìgh 's Mac Cailean,
'S tu 'shìol nam fear a bha 'n Sléibht'.

Na'm faighin an dràsd do chàradh daingean
An àite falaich o'n eug;
Ged thigeadh e 'd dhàil, a's m' fhàgail falamh
Cha b' àill leam bean eil' a'd' dhéigh:
Cha toir mi gu bràch dhuit dranndan teallaich,
Mu'n àrdaich aileag do chléibh,
Ach raogha gach mànrain, gràdh a's furan,
Cho blàth 's a b' urrainn mo bheul.

Dheanainn dhuit ceann, a's crann 's an earrach,
'An àm chur ghearran an éill,
A's dheanainn mar chàch air tràigh na mara
Chur àird air mealladh an éisg:

[TD 5]

Mharbhainn dhuit geòidh, as ròin, a's eala,
'S na h-eòin air bharran nan geug,
'S cha bhi thu ri d' bheò gun seòl air t-aran
'S mi chòmhnaidh far am bi féidh.

CUMHA CHAILEAN GHLINN-IUBHAIR.

Leis an aon cheudna.

Smaoitean truagh a th' air m' aigne,
Dh'fhàg orm smuaircean a's airsneul,
An àm gluasad a'm' leabaidh,
Cha chadal ach dùsg;
Tha mo ghruaidhean air seacadh,
Gun dìon uair air mo rosgaibh,
Mu'u sgeul a chualas o'n Apuinn
A ghluais a' chaismeachd ud duinn';

Fear Ghlinn-iubhair a dhìth oirnn,
Le puthar luchd-mì-ruin,
Mo sgeul dubhach r'a innseadh
Thu bhi 'd' shìneadh 's an ùir;
'S truagh gach duine do d' dhìlsean,
O'n a chaidh do chorp prìseil,
'An ciste chumhainn, chaoil, dhìonaich,
'S ann an lìon-anart ùr.

B'e sin an corp àluinn,
'N uair bha thu roimhe so 'd' shlainte,
Gun chion cumachd no fàs ort,
Gu foinidh, dàicheil, deas, ùr;
Suairce, foisneach, fàilteach,
Uasal, irisiol, bàigheil,
Caoimhneil, cinneadail, càirdeil,
Gun chron r'a ràit' air a chùl;
Làn do ghliocas 's do leursainn,
Gu dàna, misneachail, treubhach,
Gach àit' an sirte gu feum thu,
'S ann leat a dh'éireadh gach cùis:

[TD 6]

B'e do choimeas an dréagan,
No 'n t-seabhag 's na speuraibh,
Cò bu choltaich r'a chéile
Na iad féin agus thu?

'S cruaidh an teachdair' a thàinig,
'S truagh mar thachair an dràsda,
Nach do sheachainn thu 'n t' àite
'N no ghlac am bàs thu air thùs;
Suas o chachaile 'ghàraidh
Fhuair thu 'n acaid a chràidh mi,
'S gu'n do thaic a bhi laimh riut
'N uair ghabh iad fàth ort o d' chùl.
Air do thaobh 's thu gun chòmhradh,
'S an àm 'n do chaochail an deò uait,
T' fhuil chraobhach, dhearg bhoidheach
A' gabhail dòrtadh 'na brùchd;
Le gnìomh an amadain ghòraich,
A bha gun aithne, gun eòlas,
A reic 'anam air stòras,
Nach do chuir 'an tròcair a dhuil.

B' e 'n cridh' gun tioma, gun déisinn,
Gun àgh, gun chinneas, gun cheutaidh,
A chuir làmh a'd' mhilleadh gun reusan,
Le cion céill agus tùir;
'S e ghlac mar chomhairl' an eucoir,
'S bochd an gnothach mar dh'éirich,
Dh' fhàg e sinne fo eislean

A's e féin 'na fhear-cùirn:
'S ged nach sàmhach a leaba
Le eagal a ghlacadh,
Cha 'n e tha mi 'g acain
Ach mar thachair do 'n chùis;
An t-àrmunn deas, tlachdmhor,
A tha 'n dràs d' an Aird-chatain,
An déigh a chàradh an tasgaidh,
An àite cadail nach dùisg.

'S e do chadal gu sìorruidh
A dh'fhàg m' aigne cho tiamhaidh,

[TD 7]

'S tric smaointeanan diomhain,
A' tigh'nn gu dian orm a's ùr:
'S tròm a dh'fhàs orm an iargainn,
Is goirte tàrsa na 'm fiabhras,
Mo chomhalt' àluinn, deas, ciatach,
An déis a reubadh gu dlùth:
Mìle mallachd do 'n làimh sin
A ghabh cothrom a's fàth ort,
A thug an comas do'n làmhach
'N uair chuir e 'n spàinteach r'a shùil;
Sgeula soilleir a b' àill leam,
Gu'n cluinnt' a'm' follais aig càch
E bhi 'dol ri cromraig le fàradh,
Gus am measa dha-san na dhuinn.

Ge be neach a rinn plot ort,
Le droch dhùrachd o thoiseach,
Bu dàna chùis dha tigh'nn ort-sa,
Na do lotadh as ùr;
Bha 'na rùn a bhi olc dhuit,
'S gun chridh' aig 'aodann a nochdadh,
'S ann thàin' e sàmhach mu'n chnocan,
'S a ghabh ort socair o d' chùl:
'S e mo dhiùbhail a thachair,
'An àm do'n fhùdar ud lasadh,
Nach robh ad' chàirdean an taic' riut
Na bheireadh aicheamhail dhiubh;
'S a liughadh fiùran, deas, tlachdmhor,
Nach gabhadh cùram ro' bhagradh,
A chuireadh smùid ris an Apuinn,
A chionn gu'm faiceadh iad thu.

'S tròm a phàigh sinn an ìobairt
A chuir ar nàmhaid a dhìth oirnn,
Ged tha 'n aich'mhail gun dioladh
Thig fathast lìontan mu'n chùis,
Chuireas càch 'an staid iosail
Air son an àileagain phrìseil,

Bh' anns an àite mar fhìrean,
A chleachd firinn a's cliù:
'S bochd an naigheachd r'a àireamh
Gur h-ann a nasgaidh a tha thu,

[TD 8]

Nach tàinig fathasd mu'n chàs ud
Na dheanadh àbhachd thoirt duinn;
Ach air fhad 's gam bi dàil ann,
Cho ceart 's a tha mi 'ga ràdhtuinn
Bidh an fhalachd ud pàighte,
Mu'n téid an gamhlas air chùl.

'S iad na fineachan làidir
Bu mhath a ghabhail do phàirte,
An Rìgh a's Diùc Earra-ghaidheal,
Nach fhaiceadh fàillinn a'd' chùis;
Iarla dligheach Bhraid-Albann
Air thùs a' tighinn gun chearbaich,
'S gur iomadh fear armach
A sheasadh calma r'a chùl:
Mac-Aoidh 's a luchd leanmhainn,
Leis an éireadh suinn nach bu leanabaidh,
Na laoich bhuidhneach, mhòr, mheamnach,
Le 'n lannan ceanna-bheairteach cùil;
Mac-Dhòmhnuil duibh a's Clann-Chamshroin,
'S gu leòir do thighearnan ainmeil,
'S fhad o'n chuala sinn seanachas
Gu'n do dhearbhadh iad an cliù.

'S ghabh thu àite le òrdugh
Air pàirt do Shrath-Lòchaidh,
'S cha b' ann air ghaol stòrais,
Na los am pòrsan thoirt diùbh;
Ach a sheasamh an còrach,
Le meud do cheist air an t-seòrs ud,
'S an oighre dligheach air fògradh,
G'am bu chòir bhi 's a' chùirt:
'S ged a theireadh luchd-faoineachd
Gu'n robh t'aire-sa daonnan
'Bhi sgainneart nan daoine ud,
'N an leigeadh sgaoilteach air chùl;
Chite fhathasd a chaochladh,
N'am faigheadh tu saoghal,
Gur e bhi 'tarruing luchd-gaoil ort,
As gach taobh a bha 'd' rùn.

Bu tu cridhe na féile,
Dh'fhàs gu tighearnail, ceutach,

[TD 9]

'An làthair bhreitheimh Dhunéideann
'S tric a réitich thu cùis;
'S oil leam càradh do cheud-mhna,
'S òg a' bhantrach a'd' dhéigh i,
Lion càmpar gu léir i
O'n dh'eug a céile deas, ùr;
Fhuair mi 'n sealladh nach b' éibhinn,
An uaigh mu d' choinnimh 'g a réiteach,
'S truagh gach comunn thug spéis dhuit,
O'n chaidh thu féin anns an ùir;
'S gun dùil a nis ri thu dh'éiridh,
'S e dh'fhàg mise fo éislean
Bhi'n diugh ag innseadh do bheusan,
'S nach tig thu dh'éisdeachd mo chliù.

MOLADH AILEIN AN EARRAICHD.

Le A. Dughallach.

Mu'n cuairt an glainne còmhnard
Gun dòrtadh, 's dean barrach i,
Do'n stuth neartmhor, làidir
'Bheil càil agus fallaineachd,
A dh' òl deoch slàint' an àrmuinn,
Their càch "Fear-an-Earraichd" riut:
Gach ceum gu dol a suas dhuit,
A's buaidh air na leanas riut.
Mo dhùil gu grad thu thigh'nn gun stad
A chum gu'm faicear fallan thu,
Fhir is gasda shubhlas faiche,
Nach 'eil lag no aimbeairteach;
Air thùs gaisge cha bu tais thu
Ri uchd cath 'g a theannachadh,
'S cha chualas ann an Albainn
Ceann armailt' a thug barrachd ort.

Tha sgeul air tigh'nn do d' dhùthaich,
A's cunntas gur maireann thu;
Slàn do'n bheul a ghiùlain
An t-ùrachadh, annasach;

[TD 10]

'S naidheachd e 's an rioghachd
'Ga innseadh gu barantach,
Gu bheil thu nis a'd' Chòirneal,
'S do chòraichean ceangailte:
Fhir chalma ghlic 'tha 'dearbhadh tric
Gu bheil do mhisneach ceannardach,
B' e sud do bheus a' dol 's an streup,
A leòmhain bheuchdaich, fharamaich!

Gach àit' an d' théid thu leat a dh'éireas,
Na fir threuna, bhearraideach;
Aig meud do threu'ntais cò d' an géill thu,
'S buaidh gach euchd a' leanailt riut?

Lean gaisgeadh agus cruadail
O dhualchas do sheanar riut,
'N uair thairneadh e bho 'chruachan
A chruaidh lann gun smal oirre,
'S a ghlachdta leis neo-chearbach
An t-arm d' am b' ainm "An Reangaire,"
'S ann thigeadh sgeul an fhuathais
Air cruachdan d' am buineadh e:
'S an cùis n'an geall, 'an cùirt n'an cainnt
Cha 'n fhasan Ghall a leanas tu;
Cha chleachdadh ùr an d' chuir thu dùil,
Bho 'n tha gach cliù ri aithris ort;
'N uair a dhùisgt' thu cha bu shùgradh
Tionndadh ann an carraid riut;
Thu maith gu sìth a's garg 's an strìth-
Cha toirear cìs a dh' aindeoin dhiot.

'N uair théid thu 'n uidheam Gàidheil
Bu mhiann le bannrigh'n sealladh dhiot,
Le t' osain is maith fiaradh
'S do chalp' air fiamh na gaillinne;
Sporan a' bhruic fhiadhaich
Gun chruai'-shnaom riamh ga theannachadh,
Gu tric a' tarruing 'iallan,
'S ga riarachadh air aimbeairtich:
A ghnùis na féil' théid gasd' a t' éideadh,
Thig ort féileadh beannagach,
'Na chuaich gu dlù mu'n cuairt do d' ghlùn
Do bhreachdan ùr neo-sparrasach,

[TD 11]

Boinneid dhù-ghorm thig o'n bhùth
A théid na crùin g'a ceannach dhuit,
Fo bhàrr gu leòir do dh' ite 'n eoin
An òrdugh mar is maith leat i.

Dh' fheumadh e bhi calm' agus
Earbsach gu'm bu ghaisgeach e,
Am fear a gheibheadh eanachainn
Gu dol a thairgse batailt dhuit;
'S ann leat fhéin a dhearbhta
Bhi fear-bhuileach, acfhuinneach,
'N uair rachadh tu fo' t' armaibh
Ge meamnach, dealbhach, tartarach.
Thig bho t achlais paidhir dhag'
Nach diultadh srad 'n uair bhuineadh i
Do dh' fhudar sgairteil nach ob lasadh,

Luaidhe bhras 'na deannaibh leis;
Biodag ghlas bu chairgneach cas,
Gu tairgneach, cnapach, meallanach;
Bhiodh sud air t'fhasdadh, 's lann chinn-aisnich,
'S gàirdean gasda leanadh i.

'N uair dh' éireas bratach riomhach
A' Chòirneil rioghail, Earraichdaich,
'Ga sgaoileadh ri crann dìreach
'An àm dol sìos gu caithreamach;
Am fiùran gasda, dìleas,
Mar mhaighdean air thi leannanachd,
A' dol an coinneimh nàmhaid
A's tart gu tràghadh fal' orra:
Piobach, drumach, cruas nam builean,
Fuaim gach gunna thaitneadh riut,
Snapach, guineach, ealamh, ullamh,
Ann an cumail batailte,
'Dol gu cumasg, 's leat an t-urram,
'S tu gun chunart faiteachais;
Bu mhaith 's an Fhraing do lamh 's do lann,
A's b' fheaird' an camp na'm faict' ann thu.

[TD 12]

SIR C. CAIMBEUL, MORAIR CHLUAIDH.

Le A. Mac Alastair.

So deoch slàinte Shir Cailean
Thar fearaibh an t' saoghail;
An Caimbeulach sgairteil
Chaidh a mach 'n a Cheann-feadhna;
Bho 'n a chaidh thu thar chuantan
Dh' éirich buaidh air gach taobh leat,
Rinn do naimhdean dhuit strìochdadh,
'S rinn iad sìochaint a ghlaodhach.

Tha mo chion air an uasal,
Morair Chluaidh tha mi 'g ràdhtuin,
Fhuair thu meas agus urram
Thar gach duine do'n àl so;
Ann am fòghlum 's an gliocas,
'S ann am misneach neo-sgàthach;
Cha bu mheat air ceann sluaigh thu
'Chur na ruaig air do nàmhaid.

'S truagh nach cluinninn an sgeula
Gu'n éigt' ann a d' Dhiùc thu
'S gu'n tigeadh tu dhachaidh
Làn aiteis gu d' dhùthaich:
A Cheann-feadhna nan Gaidheal,
Do dheoch-slàinte cha diùlt sinn,

'S mi gu'n deanadh a tràghadh
Ged a phàighinn na crùntan.

'N uair a chaidh thu do Rusia
Fhuair thu urram o d' dhùthaich,
'N uair a fhuair thu Brigade
Do na Gàidheil fo d' stiùradh:
An là thug iad aig Alma
Gu'n do dhearbhadh iad an cliù dhuit,
Le an lannan geur, sgaiteach,
'S cha bu tais air an cùl iad.

Craobh is àird' anns an doir' thu
Ann an coille nan Gàidheal;
Seobhag uasal na h-ealta,
'S ursann-chatha 's na blàraibh.

[TD 13]

Thu gu h-iriosal, macant',
Caoimhneil, tairis ri d' chàirdean,
'S mar an leòmhann gu casgradh,
'N àm bhi 'tachairt ri d' nàmhaid.

'S iomadh mais' tha r'a inns' ort
Nach cuir mi 'sios anns an dàn so,
Foinidh, dìreach a'm pearsa,
'S tu gun athadh a'd' nàdur:
Fhir nach d' fhòghlum a' ghealtachd,
Bu tu cùl-taice nan Gàidheal,
'S beag an t-ioghnadh leam fhéin e
Ged thug iad spéis dhuit cho làidir.

'S ann a shaoil le luchd-beurla
Gur h-ann daibh féin a bu dìsl' thu,
Bho'n chaidh t-àrach car tamull
Ann an Glascho nan stiòpull:
Dhomhsa b' aithne do sheanachas
Le dearbhadh, 's le firinn,
Bha thu 'theaghlach ro chliùiteach
Bha 'n Aird-na-h-ùadh 'an Ile.

'S iomadh sruthan mear, uaibhreach,
A' dìreadh suas ann a d' phòraibh;
'S thu do'n fhine bha dìleas
Air taobh an rìgh a's na còrach:
Dream curanda, làidir,
Bha'n Earraghaidheal a chòmhnaidh;
'S mairg nàmhaid 'g an tàrladh
Teachd fo àrdan a' chòmhlain.

Cuiream crìoch air an dàn so
Bho nach bàrd mi 'ni òran;

Tha mo dhùrachd 's mo bheannachd
H-uile latha ri m' bheò dhuit:
Ach nan cluinninn thu thighinn
Bhiodh mo chridhe làn sòlais;
'S ged tha 'n aois air mo lagadh
Rachain astar a'd' chòmhail.

[TD 14]

DOMHNULL MAC DHOMHNUILL.

Bho 'n Bheurla, le E. M'G.

'S e Dòmhnall Mac Dhòmhnuaill is ainm dhomh
Chaidh m' àrach an garbhlach nam beann;
'S gu'n siubhlainn, fo bhratach na h-Alba,
Gach tìr mu'm bheil seanachas 'n ar cainnt:
'Dol sìos le luchd-bhoineidean dù-ghorm
Cha ghabhainn bonn cùraim roi' m' nàimh',
'S mi dearbht' as na Gàidheil mu'n cuairt domh,
Gur bàs airneo buaidh a bhios ann.
Le'n leòir de bhrochàn 's de chàl,
Le brògaibh 's osain fo'n sàil,
Gu'n seasadh iad cruadail gun athadh,
'S ro fhuathas cha ghabhadh iad sgàth.

'N trà dh' éireas duinn tilleadh gu sunntach
A dh' fhaicinn ar dùcha 's ar rìgh,
Ma theannas na Frangaich ri 'm fearra ghloir,
Gur coingeis lein fairge no tìr:
Cò 'chearn a'm bheil fear nach 'eil dìleas,
No nàmhaid do'n rìgh th' air a' chrùn?
'N a bhad gu'm bi Dòmhnall Mac Dhòmhnuaill,
'S na Gàidheil 'an òrdugh r'a chùl;
Le'n cuilbheiribh caola fo 'n sgéith,
Le 'n dagaichibh snaip air dheagh-ghleus,
Gur h-uallach a ghluaiseas Mac Dhòmhnuaill
'S na Gàidheil 'an òrdugh 'n a dhéigh.

Ged dh' éirich ar sinnsreadh le Tèarlach,
Gur cliù 's cha bu tàmailt a bh' ann.
'N uair thainig e thugainn gun chàirdean,
'Cur earbs' á luchd-àitich' nan gleann:
Gur cinnteach nach gliocas a ghluais iad-
Fhuair bàighealachd buaidh anns an àm,
'S na'm faiceadh iad Deòrsa cho faontrach
Gu'n seasadh iad aobhar gun taing.
Le 'n lanntaibh tana, geur, cruaidh,
Le 'n sgiathaibh ballach nan dual,
Ged thigeadh an donas 'n an còmhail
Gu'n leanadh iad Deòrs' anns an ruaig.

[TD 15]

Tha Gòrdanaich fearail 's a' chomhstri,
'S tha Caimbeulaich connspaideach, cruaidh,
Tha Granndaich, Clann Choinnich, a's Mòirich,
'S na Camshronaich ullamh 's an ruaig;
Tha Stiubhartaich troma-bhuileach, làidir,
Clann Leòid, 's Clann'ic Aidh o'n taobh-tuath,
Air dheireadh 'n àm seasamh na còrach
Cha 'n fhaighear Clann Dòmhnuille nam buadh.
Le'n leòir de bhrochan 's de chàl,
Le brògaibh 's osain fo 'n sàil,
Fo bhoineid, 's fo bhreacan an fhéileadh,
Cha 'n obadh, 's cha 'n euradh iad nàmh.

NA GAIDHEIL AIG ALMA.

Le A. M'I.

Tha mise so, Abrach o Lòchaidh,
'S mi fada air fògradh feadh Ghall-
'S na' faighinn o'n Bhàn-Rìgh na dh'fhòghnadh
Cha bhiodh Fear-a-còghnaidh air chall-
Na'n cuirt' ann an àite nan caorach
Sliochd sgaipte nan laoch nach 'eil ann,
Bhiodh fàrdaichean fasgach aig faonndraich-
Bhiodh aiteas a's aoidh feadh nan Gleann.
O nach robh sinn mar bha!
O nach robh sinn mar bha!
'S na'm bio'maid mar bha sinn air fuireach
Gu'n rachamaid uile gu blàr.

'N uair 'bha mi air sràidean Dhun-éideann,
Gun airgiod, gun éideadh, a' triall-
Gun chònuidh, gun chosnadh, gun bheurla,
'S b' e 'n t-eagal gu'n tréigeadh mo chiall;
'S ann chunnaic mi'n Réiseamaid sgiolta,
'S gu'n d' éirich mo mhisneach a'm' chliabh,
'S cha 'n fhiach leam gu bràth Milisi-
B'i "Dhà-'s an-Dà-Fhichead" mo mhiann.
O nach robh sinn, &c.

[TD 16]

'S an Eiphit, 's an Spàinnd, 's thar gach mara-
'S an Fhraing, 's ann an Canada fuar;
'S gu tric sinn 's na h-Innsibh 'g ar garadh-
Far nach feumainn 'bhi 'fadadh a' ghuail:
B'i 'n Reiseamaid bhudhar 's gach cath i,
Mu'n deach i fo Chailean gu buaidh,
'S b' e 'cheann-san a liath anns a' chogadh
'Bu teanadh dhuinn toiseach an t-sluaigh.

O nach robh sinn, &c.

'S ann oirnn nach tig dichuimhn' na faiche,
Far 'facas na feara fo 'n cruaidh;
'S fo bhriathran 's fo bhrosnachadh Chailein,
Ar cridheachan laiste ri'r gruaidh:—
" 'Nis'leanaibh-se 'Laochraidh nam beann mi,
A's thugaibh o'r naimhdibh a' bhuaidh,
'S na tillibh-se 'meadhon a' bhruthaich,
Ach glacaibh na mullaich gu luath."
O nach robh sinn, &c.

Deadh Ghillean-an-Fhéilidh bu ghreadhnach,
Feadh chreag agus coilltich' 'dol suas,
Ar Pìobairean 's brataichean srannrach,
G'ar greasad, mar b' annsa, gu cruas—
'S ged mharbhadh a steud-each fo'r Ceannard,
Grad laiste bha 'lann-san roi' shluagh;
'S le'r cruaidhe, le'r luaidhe, 's le'r lasair
Chaidh naimhdean mar chathadh o'n Tuath.
O nach robh sinn, &c.

Air leam gu'n robh leòmhan nan gleachd leinn—
An Gaisgeach o'n Earrachd mar bha,
Le 'cheathairne chliùiteach a chleachd e,
'S an Reangaire 'n tarruing gun sgàth—
'S na seòid sin tha 'seòladh ri'n taice—
Na fiùrain bu mhaisiche bàrr,
Nach fiaradh o'n dùchas air faiche,
'S nach lùbar le gaiseadh nam blàr.
O nach robh sinn, &c.

'S na'n tòiseachadh Alasdair Neacail
Ri 'spagluinn air faiche no sliabh,

[TD 17]

Gu'n toir sinn dha aobhar a' ghearain,
Mar thug sinn do cheannaircich riabh—
'S mar rinn sinn fo Ridire Cailean,
'S na Gàidheil 'ga leanailt gu dian—
A thràillea a thilleadh le'r deanna,
'Dhol dachaidh a dh' fheannadh nam bian.
O nach robh sinn, &c.

CUMHA DO FHEAR SHRATH-GHLAIS,
A THUIT LATHA CHUILODAIR

Le 'bhean fein.

Och! a Thèarlaich òig Stiùbhart,
'S e do chùis 'rinn mo léireadh,

Thug thu uam gach ni bh' agam,
Ann an cogadh a'd' aobhar;
Cha chrodh, a's cha chàirdean
Rinn mo chràdh, ach mo chéile,
O'n là dh' fhàg thu mi 'm aonar,
Gun sian 's an t-saoghal ach léine-
Mo rùn geal, òg.

Cò nis 'thogas an claidheamh,
No ni chathair a lionadh,
'S gann gur h-e tha air m' aire,
O nach maireann mo chiad-ghràdh;
Ach ciamar gheibhinn o m' nàdur
A bhi 'g àicheadh na 's miann leam,
A's mo thògradh cho làidir
'Thoirt gu 'àite mo rìgh màth?
Mo rùn geal, òg.

Bu tu 'm fear slinneanach, leathann,
Bu chaoile meadhon, 's bu dealbhaich';
Cha bu tàilear gun eòlas
'Dheanadh còta math, gearr dhuit;
No 'dheanadh dhuit triubhas,
Gun bhi cumhann no gann duit:

[TD 18]

Mar gheala bhradain do chasan,
Le d' ghearr osain mu d' chalpa-
Mo rùn geal, òg.

Bu tu 'm fear mòr bu mhath cuma,
O d' mhullach gu d' bhrògan;
Bha do shlios mar an eala,
'S blas na meal' air do phògan-
T'fhalt duallach, donn, lurach,
Mu do mhuineal 'an òrdugh;
'S e gu cam-lubach, cuimeir,
'S gach aon 'toirt urram d' a bhòichead-
Mo rùn geal, òg.

Bu tu iasgair na h-abhann,
'S tric a thaghaich thu féin i;
Agus sealgair a' mhonaidh,
Biodh do ghun' air dheadh ghleusadh-
Bu bhinn leam tathunn do chuilein',
Bheireadh fuil air mac éilde;
As do laimh bu mhòr m' earbsa,
Gur tric a mharbh thu le chéil' iad-
Mo rùn geal, òg.

Bu tu pòitear na dibhe,
'N àm suidhe 's tigh-òsda;

Co b' e dh' òladh 's tu phàigheadh,
Ged 'thuitedh càch mu na bòrdaibh:
Bhi air mhisg cha b' e b' fhiù leat,
'S cha d' ionnsaich thu òg e;
'S cha d' iarr thu riamh mùthadh
Air chùl do mhna-pòsda-
Mo rùn geal, òg.

Bha mi greis ann am barail
Gu'm bu mhaireann mo chéile,
'S gu'n tigeadh tu dhachaidh
Le h-aighear 's le faoilteachd;
Ach tha 'n t-àm air dol thairis,
'S cha 'n fhaic mi fear t-eugais:
'S gus an cuir iad mi 's talamh,
Cha dealaich do ghaol rium-
Mo rùn geal, òg.

[TD 19]

Och a's och! gur mi bochdag,
'S mi làn osnaich an cònuidh,
Chaill mi duil ri thu thighinn,
Thuit mo chridhe gu dòrtadh;
Cha tog fidheal, no clàrsach,
Pìob, no tàileasg, no ceòl mi;
Nis o'n chuir iad thu 'n tasgaidh,
Cha dùisg caidreamh dhaoine òg mi-
Mo rùn geal, òg.

Gur mise th' air mo sgaradh,
'S ged a chanam, cha bhreug e,
'S ioma té bha na bantraich,
Nach d'fhuair samhladh do m' chéile:
Fear do chéille, 's do thugise,
Cha robh furasd' r'a fhaotainn;
'S cha do sheas an Cuilodair,
Fear do choltais bu tréine-
Mo rùn geal òg.

'S ioma ban-tighearna phrìseil,
Le 'n sìoda, 's le 'n sròltaibh,
D' an robh mis a'm' chuis fharmaid,
Chionn gu'n tairgeadh tu pòg dhomh:
Ged a bhithinn cho sealbhar
'S gu'm b' leam airgead Hanòbhar,
Bheirinn cnac anns na h-àith'ntan
Na'n diùltadh càch dhomh do phògan-
Mo rùn geal, òg.

'S ioma bean a tha brònach
Eadar Tròiternis 's Sléibhte,
Agus té tha na bantraich

Nach d' fhuair samhladh do m' chéile:
Bha mise làn sòlais
Fhad 's bu bheò sinn le chéile;
Ach a nis o 'n a dh'fhalbh thu
Cha chùis fharmaid mi féin doibh—
Mo rùn geal, òg.

[TD 20]

ORAN LEANANACHD.

Le A. Dughallach.

Och nan och! 's mi gu cràiteach,
'S trom a tha mi fo mhulad,
A bhi 'fàgail na dùthcha
'S mo chulthaobh ri 'm chruinneig:
Oigh nam meall-shuilean mìogach
A dh' fhàg m' inntinn gun fhurán—
Dh'fhalbh mo shùgradh 's mo mhànrán
Gun bhi làmh riut a' fuireach.

Gur mis' tha fo acain
Bho mhaduinn Diciadain;
Bho 'n a ghluais mi air astar
Gu bheil m' aigne fo chianal,
Nach do ghabh mi mo chead diot
'N àm dhomh greasad as t' fhianuis;
Ach gabh thusa mo leisgeul,
Cha robh e deas dhomh r'a dheanamh.

Gur mis' tha gu cràiteach
A' falbh air bàta dubh, daraich;
'S olc càradh mo chòta
Measg còrcaich a's tearra:
B' fhearr bhi 'n gleannan an fheòir
A' briodal phòg air mo leannan,
Na bhi falbh air a bòrdaibh,
'S gun mi eòlach m'a ballaibh.

Gur mis' tha fo mhi-ghean
A tigh'nn air tir am Port-Asgaig,
Ri bhi cuimhneachadh mànrain
Màiri bhàn an fhuilt chleachdaich:
Ged a gheibhinn còir sgrìobhte
Air Ile le 'bheartas
B' fhearr leam furan do phòige,
'S t-fhaotainn pòsda le ceartas.

Bho na thàinig mi 'n tir so
Cha 'n 'eil mi titheach air cadal;

[TD 21]

Bu tric a' dùsgadh an raoir,
Le sgaoim air mo leabaidh,
Ri linn dhomh fhaicinn a'm brудар
Mo luaidh a bhi 'm thaice;
Ach 's a' mhaduinn 'n uair ghluais mi
B' fhada bh' uam i 's tir Abraich.

Greis air mhire 's air mhànrán,
B' e sud m' àbhaist 's mo chleachdadh,
Anns an tir am bheil m' eòlas
'Measg na h-òigridh dh' fhàs taitneach:
Ach lion mulad 's liunn-dubh mi,
Tigh'nn roimh shruth Choire-Bhreachdain;
'S leam a b' fhearr na mo chòta
Bhi 'n taice Lòchaidh nam bradan.

Gur a mòr mo chùis mhulaid,
'S goirt leam tromadas m' achdainn:
Eallach trom air mo mhuinneal
Ga m' chumail bho chadal;
Chaidh acad a' m' chridhe
'S cha toir lighichean as i,
Ach tha mo dhùil ann a' m' shlàinte,
Ma tha 'n dàn dhomh dol dhachaidh.

ORAN CHLANN DO'NUILL NAN EILEAN'

Beir soraidh uam gu m' eòlas
Gu Tròiternis, 's e b' aite leam;
An talamh maiseach, bòidheach,
An tir ro òrdail, mhearcaiteach;
Far 'bheil na daoine còire,
Dh'fhàs fialaidh, mòr, neo-acaineach;
Mnai-uaisl' is suairce còmhradh,
Gun ghruaim, gun phròis 'an taice dhoibh.
An tir ro fharmail, chliùiteach, ainmeil,
Mhùirneach, mheamnach, mhacanta;
Bu lionmhor sealbhach iasg na fairge
Tric 'g a mharbhadh taice ri':

[TD 22]

Thig bradan tarra-gheal, inneach, mealgach,
Iteach, earra-ghlan, breac-lannach:
Am fonn 'an dearbhte 'n cinn an t-àrbhar
Diasach, ceanna-mhor, pailt-ghraineach.

B' i sud an dùthaich fhialaidh
Air an éireadh grian gu moch-thrathach-
Tir lùbach, shrathach, iosal,

Gu monach, sliabhach, gucagach;
Tir chruachach, sguabach, liontach-
Tir mheasail, mhiaghail, thrusganach-
Tir mhòr 'tha corr gu biatachd,
Tir bhòidheach, lianach, lusanach.
Tir bhuadhach, bhlàth, gun chruas, gun chàs,
A' tigh'nn fo bhlàth gu ruiteagach;
An grunn a b'fhearr o shliabh gu tràigh,
Gu fàsach, lànach, sultmhorra:
Crodh-laoigh 's gach àit' a' sior bhreth àil,
Gu bliochdach, dàrach, sruth-bhainneach;
Is grinn a' ghàir aig fuaim nam bà
'Dol suas ri àird nan uchdanan.

Bidh mnathan donna, duallach
'N an dàil gu cuachach, cuinneagach,
'S iad modhail, banail, stuama,
Neo-ghruamach, uasal, iriosal;
Le'n àlach glan mu'n cuairt doibh
'G an togal suas gu h-innealta,
'S iad féin gu ladhach, suairce,
Gu caoimhneil, cuanda cinneadail.
Bidh òighean mìne, boidheach, fìnealt',
Stòilte, rioghail, ionghràdhach-
Gun fhuachd, gun ghris, gun ghruaim, gun sgìos,
Ro shnuagh'or, fineant, binneagach:
A's pàirt diubh 'sìor chur àird air nith,
Gun chàs, gun strith, gun iomadàn;
A's pàirt, mar chi, le lànachd ni,
'Cur fai'm air sìod' 's air ghrinneasan.

Bidh daoine tlachdmhor, còir ann
Ag òl mu bhòrd gu h-oileineach,

[TD 23]

Nach mall, 's nach gann mu'm pòca,
'S nach di d'an stòras teir'eachdain:
B' i sud an Fhine mhòrail,
Clann-Dòmhnuille Mhòr nan eileanan,
Nach inndrinn ann an dò-bheairt,
'S nach tòisich air ni 'cheileadh iad.
Na laoich 'bha treun ri àm an fheuma,
Cròdha, gleusda, fearachail;
'Bha ullamh, réidh, gu siubhal sléibh,
Gu ruitheach, leumach, deannalach;
Gur math an t-éideadh-crios am féil',
Am breacan eutrom, ainneamh orr'
An uair a dh'éighte 'cheud ratreut
Gu dol 's an streup gu ceannasach.

'N uair thogte 'bhratach bhalla-bhreac
Gu meamnach os ceann churaidhean,

'Ur laochraidh thlachdmhor, dhealbhach
Gur garg an taobh a chuirear iad,
Nan éireadh fraoch no fearg orr',
Gu'm b' anmanta, garbh, guineach iad;
Cha phillear sibh le armailt
Ged dheanadh Alba cruinneachadh.
Bidh loingear bhréid-gheal, cuan 'g a reubadh,
Seòlach, reultach, iullagach,
Lamh-dhearg 'ga h-éigheach, cinn 'g am beum
Aig seòid nach géill do chunnartan;
An taobh a dh'éight' iad, b' ullamh, réidh iad,
'S mairg d' am b' éiginn fuireach riu;
Bidh feòil gu féisd aig eòin an t-sléibh'
'S gach seòrsa béisd a chruinnicheas!

BEANNACHAD AN EILTHIRICH.

Le Eobhan Mac Colla.

Bha long nan crann caol
Mach o Mhaol dhubh Chinntire,-
Air bòrd bha iad lionmhor
'Dh' fhàg Tir nam Beann àrd;

[TD 24]

Bha ghrian ann a glòir
Anns a' mhòr chuan a' sioladh:-
Ciod e so 'chuir mi-ghean
Air laoch a' chùil bhàin?
Cha'n e an cuan dùmhail
Dh'fhàg Dùghall fo champar,-
Tha 'n deur air a shùil,
Ach 's i 'dhùthaich thug ann sud,
'S e 'coimhead, fad uaithe
Nan cruach b' fhearr leis teann air,-
Tir bhòidheach nam Beann,
Ris nach till e gu bràth.

"Mo dhùthaich!" 's e thuirt e,
"'S e t' fhàgail mo chruaidh-dhàn,
'S ann ort nach 'eil suarrach
No fuaraidh mo ghràdh;
Tha grinneas a's àilleachd
Mar b' àbhaist riut fuaighte-
Gach ni mar bu dual da
Ach t' uachd'rain gun bhàigh:
Mo chreach! bho nach buan
Na laoch chruaidh sin nach tréigeadh
'N gleann fraoich, 's an tùr liath,
Air a bhriagh'd 's gu'm biodh céin-thir,
Tha Gàidheil 'g am fògradh

Mar cheò bhàrr do shléibhtean,
'S mu lean riut Cinn-fheadhn'
'S ann air caoirich a mhàin!

O Albainn! 'n àm dùsgadh
'Thoir sgìorsadh do d' naimhdean,
Cò b' ùire n' an Gàidheal
Gu éiridh leat suas?
An cuimhn' leat na dhòirt e
De'n dearg-fhuil a'd' bhlàraibh?
'S 'n e nis bhi 'ga fhògradh
Gu bràch uait a dhuais?
Seadh, fhògradh 'thoir àite
Do phràbar na beurla-
B' e 'm ploc 'an uchd màth'r
Sud 'an àite a ceud-ghin!

[TD 25]

A Ghàe'ltachd! a Ghàe'ltachd!
B' e t' fhàgail, a geugan
A ghearradh o 'n chraoibh,
'S iad a'crionadh 's an fhuachd.

'Thir steallraich, alltach,
Ard-choillteach, thiugh-spréidheach-
'Thir àiridheach, fhraoch-shliosach,
Ghorm-lochach, àrd;
'Thir bhreacanach, cheòlraidheach,
Oranach, aoidheach,
Bu tu tir nan sgeul-
Dachaidh ghreadhnach nam Bàrd!
Ach cò 'an tir chéin
A ni 'n sgeulachd a dhùsgadh?
Cò 'thogas an t-òran
'Bhiodh sòlasach, tùirseach?
Cò 'bheanas do 'n chlarsaich,
'S na h-òighean air ùrlar?
No 'ghleusas a' phìob
'Thogail inntinn nan sàr?

O m' òige! 's tu 'mheall mi!-
Bha àm a's cha 'n fhac mi,-
Mar uiseag nan cnoc-
Ach cùis taitneis a's sunnd;
Measg gaoil, agus càirdeis,
A's slàint' agus pailteis,
Bha m' aigne cho reachdmhor
Ri bricein a'm bùrn:
O m' anam! 'd e ni thu
'Bhi 'cuimhneachadh suaimhneis-
Feall-shonas a dh' fhàg thu
Gu bràth, a's bu luath sin!

Cha phill e an t-òg mhios'
Air ròsan bhi 'bruadar,
'S cha tog e mo smuairein-s'
Bhi smuainteach' air mùirn.

A rionnag ud shuas
'S tuille 's luath rinn thu dusgadh!

[TD 26]

Tha 'ghlòmain air crùban
Air dhùthaich mo ghaoil;
Tha ghealach gu càirdeil
A' snàmh thar a stùchdan,
Ach monadh no stùchd
Nis do m' shùilean cha leur!
A lòchrana rìomhach!
'S ann ruibh-se tha m' fharmad,-
Ged ruaigeas an là sibh á
Làth'ir tir nan garbh-chrìoch,
Gu'm pill sibh gu gàireach
'Chur fàilt' oirr' gach anamoch:
Mo thruaigh'! cha bu searbh
Ach bhi 'falbh uaip' a chaidh!

A Bhan-rìgh nan cuan
Soradh bhuan 'nis bho m' chridh' leat-
'S an uair 'bhios tu 'd' shìneadh
'S an ùir fo iochd chàich,
Bidh t' ionndrain gun stàth
Air na h-àrmuinn nach dìbheadh
An àr-fhaich a chaidh,
Fhad 's bhiodh cinn air an nàimh':
Uair eile, 's gu bràth,
Soraidh slàn leat, mo dhùthaich!
'S ged bheucas na cuantan,
Gu h-uaigh, eadar thu 's mi;
Cha téid thu á m' smuain
Gus an suain anns an ùir dhomh:
Mo dhùthaich! mo dhùthaich!"
Sguir Dùghall de 'dhàn.

AN T-EILEAN MUILEACH.

Le D. Mac Phail.

An t-Eilean Muileach, 's an t-eilean àghmor,
An t-eilean grianach mu'n iath an sàile:
Eilean buadh-mhor nam fuar-bheann àrda,
Nan coilltean uaine 's nan cluaintean fàsail.

[TD 27]

Ged tha mi 'm fhògarrach cian air m' aineol,
Sa' Chaisteal-Nuadh, an taobh-tuath do Shasunn,
Bidh tìr mo dhùthchais a' tigh'nn fa'near dhomh:
An t-Eilean Muileach bu lurach beannaibh.
An t-Eilean Muileach, &c

B' fhallain cùbhraidh 's bu réidh an t-àilean,
Le blàithean maoth-bhog bu chaoine fàileadh;
Bu ghlan na bruachan mu'n d' fhuair mi m' àrach,
An Doire-chuilinn, aig bun Beinn-bhàirneach.
An t-Eilean Muileach, &c.

Air Lusa chaisleach nan stachd 's nan cuartag,
Bhiodh bradain thàrr-gheal nam meanbh-bhall ruadh-bhreas
Gu beò-bhrisg siubhlach, le sùrd ri luath-chleas,
'S na cuislibh dù-ghorm gun ghrùid, gun ruadhan.
An t-Eilean Muileach, &c.

Bu chulaidh shùgraidh do dh-òg-fhir uallach,
Le gathan trì-mheurach, rinneach, cruaidh-ghlan,
Air caol-chroinn dhìreach, gun ghiamh, gun chnuachd-mheur,
Bhi 'toirt nan làn-bhreas gu tràigh m'a bruachan.
An t-Eilean Muileach, &c.

Gheibht' an ruadh-chearc 's na coilltean ìosal,
'S a coileach tùchanach dlùth 'ga brìodal;
'S ged bha na beanntaibh gun fhaing, gun fhrìthean,
Bha dàimh na cròice 'n a còrsaibh lìonmhor.
An t-Eilean Muileach, &c.

B' e 'n sòlas inntinn leam a bhi 'g éisdeachd
Ri còisir bhinn-ghuthach ghrinn a' chéitein:
A' seinn gu sunndach an dlùth's nan geugan-
A' choill fo liath-dhealt 's a' ghrian ag éiridh.
An t-Eilean Muileach, &c.

Bho 'n chlaon gach sòlas dhiubh sud mar bhruadar,
Mar bhristeadh builgein air bhàrr nan stuadh thonn:
O! soraidh slàn leis gach loinn a's buaidh, a
Bh' air éilean àghmhor nan àrd-bheann fuara.
An t-Eilean Muileach, &c.

[TD 28]

ORAN DO 'N MHISG.

Le A. Dughallach.

'An àm dhomh gluasad anns a' mhaduinn,
Cha 'n 'eil m' aigne sunndach;
'S e mac-na-bracha 'rinn mo leagadh

Ann an leabaidh dhùinte;
Mo chliabh 'na lasair, air a chasadh,
'S airsnealach mo dhùsgadh,
'S e sud an gleachdair fhuair fo smachd mi,
'S dh' fhàg e m' aisnean brùite.

'N uair a shuidh sinn 's an tigh-òsda,
Chaidh na stoip thar chunntais,
Gu tric a tighinn, cha bu ruighinn
Iad na 'n ruith a m' ionnsuidh,
Gun iarraidh dàlach ach sior phàigheadh,
'G òl deoch-slàinte 'Phrionnsa;
'S cha 'n iarrainn féin a dh' aobhar ghàir'
Ach Raoghall a' toirt cliù dhomh.

Nuair a ghluais mi gu tighinn dachaidh,
Lagadh a chion lùith's mi,
Gun d' fhalbh mo neart, gun leursainn cheart,
Gu'n d' chaill mi 'm beachd bha m' shùilibh;
Feadh na h-oidhche 's mi gun soillse,
Air mo shlaoichd 's an dùnan;
Cha robh air chomas domh ach àrrusg
'S bha mo chàirdean diombach.

'S leur dhomh 'n diugh gur mòr an tàmailt
Càch a bhi ga m' ghiùlan,
'S mi féin 'an duil gun robh mi làidir
Gus an d' fhàg mo thùr mi;
Ged a chuir i 'n éis mo cholunn
'S e mo sporan 'dhioghail
Air gnìomh na misg' a mhill gun fhios mi,
Mar d' thig gliocas ùr dhomh.

'S olc an ealainn bhi 'ga leanailt,
'S amaideach an tùrn 'bhi

[TD 29]

'Suidh' aig bòrd a' glaodhach òil,
'S mo phòcannan 'g an tionndadh;
A' sgapadh stòrais le meud-mhòir,
'S ag iarraidh phòg 's na cùiltean:
'S fhad 's a mhaireadh mo chuid òir
Cha chuireadh òsdair cùl rium.

'S còir dhomh nis a thoirt fainear
An t-aithreachas a dhùbladh-
Mo bhòid gu gramail thoirt 's an ealaidh
Dh' fheuch an lean mo chliù rium;
Cha d' théid deur a stigh fo m' dheudach,
'S fheudar tigh'nn as iùnais;
Cha 'n fhaigh fear falamh seòl air aran
Ach le fallas gnùise.

Labhair Raoghall, “Na biodh sprochd ort,
'S théid mi 'nochd air ionnsuidh,
Gleidhidh mi dhuit bean a's tochar
Cho coltach 's tha 's an dùthaich;
Ged a bhiodh tu gann do stochd
Na faicear bochd do ghiùlan;
'S c'arson nach glaidheamaid air botal
Ann an toiseach cùmhnaint?”

“Gur a caraid thu ro dhearbhta,
'S cha 'n 'eil cealg a' d' rùn domh—
Gu cinnteach dh' fhaodainn—sa riut earbsa
Sealbhachadh 'sa chùis sin;
Ach ged 'ghleidheadh tu dhomh céile
'G am biodh spréidh ri 'chunntas,
Cha téid deur tuilidh dheth fo m' shròin,
Gu bheil mo sgòrnan dùinte.”

“Ged a chuir thu cùl ri m' thairgse,
'S dearbh gu'n deanainn saothair,
'S fada shiùbhlainn oidhche romham,
'Chionn do ghnothach fhaotainn;
Maighdean 'thigeadh air do leabaidh
Mar a chleachd do dhaoine;
'S bho nach toigh leat bhi ga h-innseadh,
'S tiomail dhuinn bhi 'sgaoileadh.”

[TD 30]

ORAN DO THRIATH GHLINNE—GARRADH.

FONN,—

“Faigh a nuas dhuinn am botal
'S cuir an deoch so mu'n cuairt,
Lion barrach an copan,
Cum socair a' chuach;
Toasta Chòirneil na féile
Leis an éireadh gach buaidh,
Oighre Chnòideart a' bharraich,
'S Ghlinne—Garradh bho thuath.

Thig ort measair a's adharc
Agus taghadh nan arm,
Le d' mhial choin air lothainn,
'S iad romhad a' falbh;
'N uair théid thu do'n mhonadh,
Bidh fuil air damh dearg;
Cas a shiubhal an fhirich,
Leat a chinneadh an t-sealg.

'S tu marbhaich' a' choilich
'S moich' a ghoireas air crann—

'Bhuic bhioraich an t-seilich,
Agus eilid nam beann:
'S tric a leag thu 'n an luath's
A' chaol ruadhag 's am manng,
'N uair a ruigeadh do luaidhe
Cha ghluaiseadh iad eanng.

'S tu nàmhaid na h-eala,
Lamh a mhealladh a' gheòidh;
B' fhearr leat fhaicinn 's an adhar,
Na e luidhe air lòn-
Air iteig 'ga chaitheadh
Bhiodh luaidh' air a thòir,
Bho ghunna 'bheòil chumpaich,
'S cha bhiodh ùin' aige beò.

Lean do chruadail, 's do ghaisgeadh,
'S am fasan bu dual
A bhi colgarra, cosant'
'Am brosnachadh sluaigh;

[TD 31]

Gu h-armailteach, treubhach,
Gu geur-lannach, cruaidh;
'S tu 'shliochd nam fear treuna
Nach géilleadh 's an ruaig.

Tha 'n naigheachd so fìor
Aig luchd-innseadh nan duan,
Gur sgeul e ro chinnteach,
Air do shinnsear' bha buaidh;
Nach do dhìbir an deas lamh,
Ach seasamh 's gach uair,
'S i bhuidhneadh a' chis
Ri h-uchd strithe le fuaim.

Ghabh thu tlachd a's deagh-cheutaich
Do'n bheus a bh'aig càch-
Luchd bhreacan-an-fhéilidh
A dh' éireadh a'd' phàirt;
Toirm fheadan 'g an gleusadh,
Leat is éibhinn an gair'
Mar ri binneas nan teud,
'S a bhi 'g éisdeachd nam bàrd.

Tog suas an crann dìreach,
Bratach rìomhach gun sgàth,
Le culaireabh rioghail
A dh' innseas co iad;
'S cha 'n ob do chuid ghillean
Dol 'an iomairt na spàirn,
'S tu féin air an toiseach

A' toirt mosgladh d'an càil.

Tog colg ort, fhir-ghasda,
Bi gaisgeil, 's gu'm faod-
Thig marcaich' a's coisichean
Ort air gach taobh:
'S farsuinn, lionmhor do chòraich',
Clann Dòmhnail an fhraoich-
Thig do chinneadh a d' chòmhnadh,
A chraobh chòmhraig nan laoch!

Tha fir chalma, ro fhearail,
Ann a d' fhearannaibh féin,

[TD 32]

Eadar Cnòideart 's Gleann-Garradh,
'Théid barraicht' air ghleus;
'Chuireas cùl air an naimhdean-
Tha 'n ceannard d'an réir,
'S cha ghabh thu bhi ceansaicht'
Le Granndaich Shrath-Spé.

'S leat càirdeas, le dùrachd,
Fir ùr Innse-Gall,
Nach gabh giorag no mùiseag
'N àm rùsgadh nan lann;
Na'n cluinneadh iad strìth riut
Bhiodh mìltean diubh 'nall;
'S mu'n leigeadh iad cùis ort
'S iad a dhùbladh do rànc.

Thig a'd' choinneamh le farum
Buidheann bhras nan arm cruaidh,
A bhuaileadh na buillean,
'S a chuireadh an ruaig:
'Bha gu h-àrdanach, reachdmhor,
Gu feachd a' dol suas,
Bho Cheapach nan craobh,
A dh'fhàg na glaoidh 'sa' Mhaoil-Ruaidh.

Bho Chomhann nam bradan
Is gasd' thig fo thriall,
Clann Iain gun ghealltachd,
Bha 'n neart-san leat riamh;
Le'n airm 'an deadh òrdugh-
Luchd a leònadh nam fiadh,
'S a dheanadh an tolladh
Mu'n cromadh a' ghrian.

Cò 'thàirneadh riut rioba
'N uair thig na bheil uait?
Iarl' Antrim á h-Eirinn

Leis an éireadh na sluaigh;
'S Mac-'ic-Ailein nan geur-lann,
Dheanadh euchd air a' chuan,
Aig a bheil na fir ghleusda
'Dhol a reubadh nan stuadh.

[TD 33]

Thig iad sud ort le dùchas
Bho thùr nan clach réidh,
Bràithrean Dhòmhnuille, Clann Dhughaill,
Marcaich shunnach nan steud:
Clann-an-t'Saoir bho thaobh Chruachain
'Bha riabh cruadalach, treun;
Ged a chaill iad a' chòir 'bh'aig
An seòrs' ann an Sléibht'.

DO 'N EIDEADH GHAIÐHEALACH.

Le D. Dughallach.

SEISD-

O! Fhéilidh bhig nan triuchan dearg,
Ris nach faodar beantainn garg;
'S maing a ghearradh dhiot-sa cearb,
'S do leannan dearbhta fodhad-sa.

'S i boineid, 's lus no geug do chraoibh,
Sàith' 'an cìrein airgid daor,
Suaicheantas d' an tug sinn gaol,
'Bhi shuas 'na taobh gu cocannta.
O! Fhéilidh bhig, &c.

Mo cheist na laoich 'thug gaol an crì'
Do'n bhoineid ùir is dùlaidh lìth,
'S nach caith mu'n cinn am feasd ach ì,
'S gu'n diol gach rìgh 'bheir spoch aisde.
O! Fhéilidh bhig, &c.

Cha 'n fhacas ceann-bheairt air neach riamh
'Chuireas aghaidh dheth le fiamh
Mar 'chuireas boineid, 's i car fiar,
Air malaidh sgiamhaich, fhosgarra.
O! Fhéilidh bhig, &c.

'S e breacan-guaille 'suas le rian,
Thar nan guaillean 's cuairt mu'n chliabh,
Cùlaidh 's maisiche mu chliar
A chuir a ghrian a solus air
O! Fhéilidh bhig, &c.

[TD 34]

'S e dreach nan Gàidheal sàr-dheas, cruaidh,
Le'n cuid bhreacan umpa suaint',
Aogas nam fear-clise luath,
'S an àirde tuath a's reothadh ann.
O! Fhéilidh bhig, &c.

Oir ged 's e 'n dealbh a chì mo shùil
Tàirnt' air paipeir ann am bùth,
Sheasainn mar gun trèigeadh lùgh
Mo chàil, 's mi'n rùn bhi 'coimhead orr'.
O! Fhéilidh bhig, &c.

A chòta bhasaich, nan dath aosd',
'S lionmhor treun a leugh gu daor
Cò 'bha 'd' luib mu'm biodh tu 'd fhaobh
Aig nàmhaid laochail, dhocharach.
O! Fhéilidh bhig, &c.

Barr-maise snuaidh crios-guail' air seòd,
Làn do reultan seudach dhreòis,
'An glasan airgid agus òir,
Le claidheamh mòr 'an crochadh air.
O! Fhéilidh bhig, &c.

C'arson a dh'fhàgann crios a' chléibh,
Ris an naisg an Gàidheal gleusd'
Biodag, 's dagaichean nan leug
Gu h-àm bhi feum an cobhair-san.
O! Fhéilidh bhig, &c,

'S e sporan mollach 'chuilg-ghil, réidh,
Usgar sgéimhe d'an tug tréin
Miann an cridhe thar gach seud,
'Bhi air an sléisdean tomultach.
O! Fhéilidh bhig, &c.

Tha 'm féileadh beag a nis 's gach cùirt
'Na aobhar fharmaid agus tnù;
'S cha b' iognadh ged a chì mo shùil
E air gach fiùran somalta.
O! Fhéilidh bhig, &c.

[TD 35]

'N àm dol do'n sgoil bu deas do dhòigh
Chum gach àbhacais a's spòrs;
'S e chionn thu bhi mu m' leasraidh òg
A chuir gur h-eòlach ortsa mi.
O! Fhéilidh bhig, &c.

Bu roghainn thusa latha féill

A dhol gu h-athghoirid an t-sléibh;
'S gur tu nach cuir air easgaid éis
Feadh fhéithichean a's bhoglaichean.
O! Fhéilidh bhig, &c.

'S e osan cearmant', dhearg-bhall, dlùth
Is bòidhch' air calpa 'chunnaic sùil,
'S e 'dol a suas mar "réis do'n ghlùn,"
Fo ghartan ùr nan dòs bhadan.
O! Fhéilidh bhig, &c.

Nach sgeinmeil brògan 's bucail lìobht'
Do 'n airgead ghrinn is gloinne lìth,
'Bhi 'dealradh air deas-throidhean sìinnt'
Nan gallan dìreach, foghainnteach.
O! Fhéilidh bhig, &c.

'S e féileadh beag nam pleat is rìgh
Air gach deis' is àirde prìs,
'S cha bhi air ceum nan Gàidheal cìs
Gu dol gu frìth no monadh leis.
O! Fhéilidh bhig, &c.

'S bòidhche leam na priobadh reult'
An lannair mheachair 'thig o d' sgéith,
'N àm dol roimh 'n ruidhl' air cruachan tréin,
'S gach pleat a' leum gu togarrach.
O! Fhéilidh bhig, &c.

DO GHIL' OG A GHABH 'S AN ARM.

Le A. Mac Alasdair.

SEISD—
Horo! tha mi muladach
Ri cumha na bheil bh' uainne;

[TD 36]

Horo! tha mi muladach,
Cha tog mi fonn le subhachas,
'S e fear na gruaige duibhe
'Chuireadh mulad dhìom a's smuairean.

'S mise tha gu deurach
'S a' mhaduinn an àm éiridh,
A' cuimhneachadh air Eamunn,
'S gur h-éisleanach mo ghluasad.
Horo! tha mi, &c.

'S e mo ghaol an t-òigear
'G am bheil a' phearsa bhòidheach—

O'n dhealaich thu cho òg rium
Gur tric na deòir le m' ghruaidhean.
Horo! tha mi, &c.

Chuir thu còta sgàrlaid ort,
Le suaicheantas na bàn-righ'nn-
Tha mulad air do chàirdean
Cho tràth 's a thugadh uainn thu.
Horo! tha mi, &c.

Thainig òrdugh cabhagach
Gu d' thoirt air falbh do Shasunn uainn,
'S gun dùil gu'n till thu 'n gradaig ruinn,
'S e dh'fhàg mo chadal luainneach.
Horo! tha mi, &c.

Cha 'n 'eil cron ri 'àireamh ort
Bho chùl do chinn gu d' shàiltean;
A'd' sheasamh aig parade,
Gur h-àileagan 'measg sluaigh thu.
Horo! tha mi, &c.

Cha 'n aithne dhomh fear t-aogais-
Do ghruaidhean mar na caoran-
Do shlios cho geal 's an fhaoileann
A thig o thaobh nan cuantan.
Horo! tha mi, &c.

Do ghruaidhean mar na ròsan-
Do chneas mar chanach lònintean;

[TD 37]

Bu mhilse leam do phògan
Na fion 'ga òl á cuachan.
Horo! tha mi, &c.

Sùil chorrach is glan lìonadh
Fo'n mhalaidh a dh'fhàs sìobhalt'-
Deud shnaighte mar na dìsnean
'S a' bheul o 'm binn' thig duanag.
Horo! tha mi, &c.

'S iomadh maighdean bhòidheach,
Le sìod' orra mar chòmhdach,
A dh' fhalbhadh leat gu deònach,
'S a chuireadh òr ad fhuasgladh.
Horo! tha mi, &c.

Na'n tugte bh' uainn le h-eucoir thu
Gur h-ioma fine 'dh'éireadh leat-
Clann-Alasdair na'n geur-lann,
Nach géileadh d'an luchd-fuatha.

Horo! tha mi, &c.

Thig Caimbeulaich a's Leathanaich—
Thig Dòmhnallaich gun athadh ort—
An còmhlan treubhach, fearail,
Nach bu mheata 'chur na ruaige.
Horo! tha mi, &c.

An raoir air mo leabaidh dhomh,
'S ann chunnaic m'ia'm' aisling thu—
Air dùsgadh anns a' mhaduinn dhomh,
Mo chreach gu'm b' fhada bh' uam thu.
Horo! tha mi, &c.

'S beag ioghnadh mar a tha mi,
Gach latha 's oidhche cràiteach,
A' cuimhneachadh na dh'fhàg sinn,
Fear àrd an leadain dualaich.
Horo! tha mi, &c.

[TD 38]

AN GAIDHEAL AM MEASG NAN GALL.

Le Iain Mac Ghilleain.

Och! a rùin gur tu th' air m' aire—
Och! a ghaoil gur tu th' air m' aire:
'S tusa 'rùin, 's gur tu th' air m' aire,
'S gur h-i mo dhù'aich tha tigh'nn fainear dhomh.

Cha togar fonn leam ach trom air m' aineoil,
Cha dean mi òran 's an dòigh bu mhaith leam:
Gur mi bha gòrach 'n uair thug mi 'n gealladh
Do 'n nionaig òig a bha chòmhnaidh 'n Cana.
Och! a rùin, &c.

Gur h-ann le h-àilgheas a dh' fhàg mi 'm fearann
'S an deachaidh m' àrach 'n uair bha mi 'm leanabh;
'S mi 'n dùil gu'n deanainn am bliadhna 'dh'earras
Na cheann'chaidh lìon dhomh gu iasgach earraich.
Och! a rùin, &c.

Gur mi bha stàtail 'n uair dh'fhàg mi Ailean,
Ri togail gàraidh 's a' càradh bheallach;
Gu'm b'fharr bhi ann air neo 's mealta 'bharail,
Na bhi 's an àm ann an tainng na'n Gallaibh.
Och! a rùin, &c.

Cha ghabhainn tuarasdal uaith mar sgallaig,
Ach tigh'nn do'n Ghalltachd a shealltainn chaileag;
'S 'n uair ni gach té dhiubh a'm beurla m' fharraid,
Their mis' an Gàilig gu'n d' fhàg mi Barra.

Och! a rùin, &c.

Cha 'n 'eil e 'còrdadh rium seòl a h-arain-
Bhi 'falbh Di-dòmhuich 's a' giùlan eallaich;
'S nach faigh mi fàrdach, na àit' am fanain,
Ach sabhal fàs, air-neo stàbull ghearran.
Och! a rùin, &c.

'N uair ni sinn gluasad Di-luain do 'n bhaile,
Bidh bodaich Ghalld' ann 'an geall air mealladh;
Cha tuig mi'n nàdur le 'n cànan Ghallaich-
Tha mise dàll 's gun an cainnt am theangaidh.
Och! a rùin, &c.

[TD 39]

Thoir soraidh uam-sa thar chuan' gu m' leannan,
A's innsibh féin di gu bheil mi fallan-
Gu bheil mi'n tràs' ann an Ca'der parish,
'S gu'n deach' a' Ghàilig á àite seallaidh.
Och! a rùin, &c.

Is tu, 'Chatriona, tha tigh'nn air m' aire-
Cha 'n e do stòras a rinn mo mhealladh;
Ach thu bhi bòidheach, gun bhòsd, gun bharrachd,
Do'n fhine mhòr, o Mhac Leòid na Hearadh.
Och! a rùin, &c.

PRIONNS' TEARLACH A' DEALACHADH
RI FLORAIDH DHOMHNULLACH.

Le D. B. Mac Leoid.

'Dh'ionnsuidh cladach a' chuain,
Ri fuar-ghaoth an anamoich,
Thainig Teàrlach gun dealradh,
Air alaban 's e sgìth;
Cha robh reul air a bhroilleach,
No freiceadan a' falbh leis,
Ach ainnir nan gorm-shul
Bu dealbhaiche lìth:
Mar dhaoimean 'san oidhche
Bha 'mhaighdean fo thùrsadh,
'S i cràiteach thaobh Theàrlaich
Bhi 'fàgail a dhùthcha;
Bu chianail a h-osna,
'S bu ghoirt deòir a sùilean,
'N uair chunnaic i 'n iùbhrach
A' dlùthadh ri tìr.

Bha 'ghealach a' snàmhadh
Thar àirde nan stùchd-bheann,

'S a gathannan siùbhlach
Air dlùth-thonna 'leum;
Ach ghrad thug i 'n aire,
'S mar òigh air a ciùradh,

[TD 40]

Chuir sgàil air a gnùis ghil
Do thiugh-neòil nan speur:
A's dh' fhalaich na reultan
Iad féin anns a' ghorm-bhrat,-
Bha osna na gaoithe
'Trom-chaoidh na bha 'falbh leath';
'S b' e gearan a' chuain
'An àm bualadh ri garbh-chreig,-
"Mo léir-chreach! an Albainn
'S ann mharbhadh na tréin!"

Sheas Flòraidh a's Teàrlach
Air tràigh nan tonn caoir-gheal,
'S bu reub-chridheach, aog-neulach
'N aogas le cràdh-
Cha robh focal o 'm bilibh
Ach sileadh gun fhaochadh,
'S iad aodann ri h-aodann
Air glaodhadh le gràdh:
Ach thainig a' bhìrlinn,-
'S i 'n rìbhinn a thòisich,
Le brist-ghuthan anamhunn
Air seanachas gu dòimheach,
Mar chlarsach 's a teudan
Gun ghleusadh, gun òrdugh,
Bha reult nam ban oga
Fo dhòlum 's fo spàirn.

"A Theàrlaich mhic Sheumais,
'Ic Sheumais nan cùirtean,
Mo leònadh! do chrùn
Bhi air umpaidh gun euchd;
Mo leònadh! na treun-laoich
Cha'n éirich, 's cha dùisg iad
A trom-chadal dùint shùileach
Udlaidh an éig!
Cha ghlac iad an lann
Anns a' champ' ri uchd nàmhaid-
Cha sgap iad fir Shasunn
Mar asbhuaibh 's na blàraibh-
Cha 'n fhaic iad do bhratach,
'S cha ghlac iad air làimh thu-

[TD 41]

Ni 'n sàile 's am bàs
'Ur fad-fhàgail o chéil'!

"A Theàrlaich mhic Sheumais,
Ma dh' fheumas tu triall uainn'
Gu'n coimhead Mac Dhia thu
Bho fhiaclan nan daoibh!
Gu'n stiùr e an iùbhrach
Air dlùth-thonna liath-ghlas,
Gu réidh-shligheach, dian-shiubhlach,
Fior-luath gu tìr!
Gu'm boillsge anns an oidhch' ort
Na soillsearan nèamhaidh,
Gu h-iùlmhor 'g a d' ghiùlan
Do dhùthaich 's nach fheum thu,
Bhi 'n ad fhògarrach brònach
Fo chòmhdach mar reubal'
Aig allmharraich éitidh
Neo-spéiseil 'n an crìdh'.

"O Albainn! tha 'n t-àm aig
Do cheann-sa 'bhi 'dòrtadh,
'S do Phrionns uait air fògradh,
'S do laochraidh 's an uaigh!
Biodh crònan do phioban
A' sìor dhiùltadh ceòil duit,
'S do chlàrsaichean rò-mhilis
Dòimheach gach uair;
Biodh cruitearan sgiathach
Nam fìor-chrannaibh sàmhach,-
Cha dòirt iad an ceileir
'Am broilleach mo Theàrlaich-
Cha dùisg iad na treun-laoich
A dh' eug anns an àrfhaich'-
'S cha mhosgail o 'n bhàs iad
Air àirdead am fuaim!"

Ach stad i,-'s le 'ròs-bhilean
Phòg e a' mhaighdeann,
A' siabadh gu caoimhneil
Nan deura' o 'sùil:-

[TD 42]

"Glac sòlas a Fhlòraidh
Tha òganaich Fhrangach
A dh' éireas neo-ghann leam
A bhuannachd mo chrùin:
'S tha lasgairean anaghlonnach
'N Albainn a dhùisgeas,
Le'n trusganan balla-bhreac,
'S le'n armaibh math, dùbailt',
Théid cath-thromp nan garbh-chrìoch
Le borb-sgread gu bùirich,

'S bidh trupairean crùbach
Gun lùgh's anns gach cùil!"

Dh' fhàg e i 'caoineadh
'Na h-aonar air tràghaid,
A's sheòl e 's a' bhàt' uaip'
A' fàsgadh nan dòrn;
Bha 'cliabh air a lìonadh
Le h-iarguin los sgàineadh,
'S i airsnealach, ànrach,
Gun mhànràn, gun cheòl.
Laidh braona na h-oidhch'
Air a' mhaighdinn ghlain, àluinn-
Bha 'h-inntinn gu luaineach
Air chuan mar ri Teàrlach-
Cha 'n fhac i e tuille
Chum na builean a phàigheadh;
Ach mheudaich a gràdh dha
Gach là bha i beò.

DO SHIR EACHANN MAC-'ILLEAIN.

Le Mairearad Ni'c-Lachainn.

'Thi tha 'n cathair nam feartan
Cum ceart agus còir ruin,
'S cuir deadh sgeul thugainn dhachaidh
Air Sìr Eachann nan ròiseal:
'S ach ma chaidh thu as t' fhearann,
'S tu bhi tamall air fògradh

[TD 43]

Gur h-e sgeula mo sgaraidh
Càch ag aithris nach beò thu.

A Shìr Eachainn nan lùireach,
Nan long siùbhlach, 's nam bratach,
'S nan cùirteinean rìomhach,
Gu'm bu lìonmhor do ghaisgich;
'S a liuthad fleasgach mòr, prìseil
'Théid a sios leat gu batailt-
Bhiodh tu 'n toiseach fir Alba,
'S bu mhòr t' armailt ri 'm faicinn.

'S tu 'chraobh is àird' anns an doire
Th' ann an coille nan Gàidheal,
Agus connspunn gun ghiorag,
Sgiath air uilinn Phrionns' Teàrlach:
Bu tu iuchair an fhuasglaidh,
'N uair bu chruaidh, no bu chàs e-
Meud do ghliocais 's do chéille
Bheireadh réidh as gach càs thu.

Tha thu 'd' dhalt' aig a' Bha-righ'nn,
'S mòr an gràdh thug i féin duit-
Mar léine-chneis aig a bràthair,
'S mar aisinn chnàmha nach tréigeadh.
Chaill thu t' oighreachd, a's t' fhearann,
'S thug thu thairis gu léir iad,
Airson seasamh gu rìoghail,
'S rinn do shinnsearachd féin sud.

Tha mo chion air an fhìor-fhuil-
Og rioghail na h-ealtainn;
Agus cuilean an leòmhainn,
'S òg a dh' fhòghlum thu gaisgeadh:
Ursann chath thu roimh mhiltean,
'N àm dol sìos ann am batailt;
'S b' urra shuidheachadh blàir thu
Ged robh càch ann an gealtachd.

Dh' aithnich latha Chuilodair
Gu'm bu dosgach na Gàidheil,
'S gu'n robh thus' ann an Sasunn
An déigh do ghlacadh le d' nàmhaid;

[TD 44]

Ach na 'm bitheadh tu aca
Mu'n do chaileadh an àrfhaich,
Cha rachadh fir Shasunn
Slàn dhachaidh gu'n àite.

Tha do chaistealan geala,
'S do thalachan prìseil,
Far 'm biodh òl agus aighear
Aig luchd-caithidh an fhìona-
O! luchd nan adaichean dubha,
Sgeul tha dubhach le m' inntinn,
Nach robh sibh anns a' Chaillich
Fo chaitheam an lionadh.

Tha mo chridh' air a thràghadh
Mar àrcan a fhliuchadh,
No mar fhiadh anns an fhàsach
A ghearrta gach cuisle:
Gach aon naigheachd is cruaidh leinn,
'Tigh'nn cho luath ri each trupa;
'S gu bheil cuid ac' ag ràdhtain,
Fàth mo chràidh! nach till thusa.

'S tha do mheasana guaille,
'S do dhaoin'-uaisle le chéile,
'S tha do mhial-choin gun fhuasgladh-
Snaom-chruaidh air an éill ac';
Iad a' fulang gach mùiseag-

Slat sgiùrsaidh nam béisdean,
'S iad a' feitheamh na h-uaire
Gus am fuasgail thu féin orr'.

Cha 'n e cumha nan caorach
Tha mi 'caoineadh 's an earrach;
Ach ri iargain nan daoine
Ris am faodainn mo ghearan:
'S ann diubh Ailean Mac-Theàrlaich-
B' e mo chràdh do chall fola,
'S i 'n a ruith as gach taobh dhiot
'N a caochana meara.

Ormsa thainig an t-ànradh
'An tùs geamhraidh na gaillinn!

[TD 45]

Na h-eich ghorm agus dhubha
'G ad bhruthadh, 's 'g ad phronnadh;
'S nach tug iad do dh' I thu
Mar ri sinns' reachd do shean'ar-
Far 'n robh cuirp nan seachd righrean
Do 'n fhìor-fhuil bu ghlaine.

S ann a theireadh Clann-Lachainn
Nach fanadh iad uaitse,
Ged nach d' rinn iad a dhearbhadh
'An àm t-fhaicinn 'sa chruaidh-chas:
'S ann a leagadh an Caiptein
A bh' agad ri d' ghuallainn;
'S gu'n d'fhuirich thu faisg air
Gus 'n do threachaileadh uaigh dha.

'S mithich dhomhsa bhi sàmhach-
Sgur do dh' àireamh nan uaislean:
Tha mo dhòchas 'an Iosa
Nach fìor mar a chualas;
Ach gu'n tig Mac-'Illeain
Nall fhathasd thar chuantan,
'S gu'n téid sinn na chòdhail
Glé dheònach 's an uair sinn.

DUANAG DO CHRUACHAN-BEANN.

Le P. Mac-an-t-Saoir.

Cruachan-beann, Cruachan-beann,
Cruachan-beann, 's mòr mo thlachd dhiot
Cruachan-beann thar gach meall,
'S a chuid allt 'ruith roi' ghlacaibh.

Cruachan-beann 's e cho mòr,
Tha e sònraicht' r'a fhaicinn-
Cha'n 'eil a leithid 's an Roinn-Eòrp',
'S geal a chòta 'n àm sneachda.
Cruachan beann, &c.

[TD 46]

Clann-an-t-Saoir d'am bu dual
'Bhi 'n a d' chluanagan fasnach;
An diugh cha'n fhaic mi aon do'n àl
'Gabhail tàmh ann a d' thaice.
Cruachan-beann, &c.

'S iomadh linn bho n' fhuair iad còir
Air a' bheinn is bòidhch' r'a faicinn;
'S cho' fhad' 's a ruitheas uillt gu cuan
Bidh an dualchas ud aca.
Cruachan-beann, &c.

Fine 's duineala, gun ghruaim,
'Nàm dol suas thun na batailt;
'S an Ceann-cinnidh air an ceann
'Toirt comand' do na gaisgich.
Cruachan-beann, &c.

An Leitir-beann chaidh m' àrach òg-
Leitir bhòidheach nam badan;
Gheibhte fiadh ann air an t-sliabh,
'S earbag ria'ch anns gach glac dheth.
Cruachan-beann, &c.

Aite 's maisiche fo'n ghréin
Chaidh cha leur dhomh r'a fhacinn;
'S bho 'n a chuir iad thu fo fhéidh,
'S goirt mo dheur 'gabhail beachd ort.
Cruachan-beann &c.

Fichead mìle tha mu'n cuairt
Anns a' chruaich ud tha maiseach;
Agus trì dhiubh air àird',
'S iomad bàrd a ghabh beachd ort.
Cruachan-beann &c.

Soraidh 'nis le Cruachan-beann,
'S leis gach coire, 's gleann tha 'n taic ris:
'S e mo dhùrachd Clann-an-t-Saoir
Bhi chòmhnuidh ri dhà thaobh 's na thaice.
Cruachan-beann, &c.

[TD 47]

DUANAG O 'N BHEURLA.

Le A. M'I.

O 's rùnach leam mo rìbhinn donn
'S a' ghleann taobh thall nam fuar-bheann-
San fheasgar chiùin théid mi le m' rùn
Gu doire dlùth nam fuaran.

Mo sheang-choin-seilg tha'n garbhlach í hiadh,
S' mo chridhe cian tha'n còmhnuidh,
'Sa' ghleann san éisd mo Mhàiri ghrinn
Ri ceilear binn na smeòraich.
O 's rùnach leam, &c.

Tha eòin an t-sléibh air sgéith mu'n cuairt,
'S cha dùisg iad fuaim mo làmhaich,
A's mis' am pràmh an sgàth nam bruach,
'S mo smaoin mu'n ghruagaich ghràdhaich.
O 's rùnach leam, &c.

'Si 's aotruim' ceum 's is deàrsaich' sùil,
'S a gair' tha ciùin a's caoimhneil,
'S a guth tha dhòmhs' mar shòlas ciùil
'S mi falbh nan stùchd san oidhche.
O 's rùnach leam, &c.

'S e 'caoin-fhalt fàinneach 's àillidh sgéimh,
'Sa bràighe 's glé-gheal, bòidhche,
Fo osna 'cléibh ag éiridh séimh,
Mar fhaoilinn bhàin air Lòchaidh.
O 's rùnach leam, &c.

A cridhe caomhail 's aotrom sunnd,
Mar mhang aig sùrd an réidhlean;
Ach caomh a's tlàth mar bhlàth fo dhriùchd,
Am maise chiùin a' chéitein.
O 's rùnach leam, &c.

Mo rìbhinn ghràidh a's àillidh sgiamh
'S tu 's àraidh beus 's is bòidhche,
'S a mhaise dh' fhàs air gràdh nan ceud
Cha tréig thu'n Inbhear-Lochaidh.
O 's rùnach leam, &c.

[TD 48]

Ged gheibhinn lu-chuirt 's crùn an Rìgh
A t-iùnnais dhiòbrainn còir orr;
'S mo bhean 's mo bhan-rìgh bheirinn ì
Gu tuine 'n tìr na' mòr-bheann.
O 's rùnach leam, &c.

LATHA CHUILODAIR.

Le Iain Ruadh Stiubhard.

O! gur mis' th'air mo chradh,
Thuit mo chridhe gu làr,
'S tric snithe gu m' shàil o m' leursainn.
O! gur mis', &c.

Dh'fhalbh mo chlaistinneachd uam-
Cha chluinn mi 's an uair,
Gu mal no gu luath ni 's éibhinn.
Dh'fhalbh mo, &c.

Mu Phrionns' Teàrlach, mo rùn,
Oighre dligheach a' chrùin,
'S e gu'n fhios ciod an taobh a théid e.
Mu Theàrlach, &c.

Fuil rioghail nam buadh
Bhi 'ga diobairt 's an uair,
'S mac diolain le 'shluagh ag éiridh.
Fuil rioghail, &c.

Siol nan cuilean a bha,
D'an ro-mhath chinnich an t-àl,
Chuir iad sinn' ann an càs na h-éiginn.
Siol nan cuilean, &c.

Ged a bhuidhinn sibh blàr,
Cha b' ann d' ur cruadail a bha,
Ach gun ar sluagh-ne bhi 'n dàil a chèile.
Ged a bhuidhinn, &c.

[TD 49]

Bha iad iomadaidh uainn,
Dheth gach fine mu thuath,
'S bu mhisde sinn' e ri uair ar feuma.
Bha iad iomadaidh, &c.

Còig brataichean sròil,
Bu ro mhath chuireadh an lò,
Gun duine dhiubh 'chòir a chéile.
Còig brataichean, &c.

Iarla Chrompa le shlògh,
Agus Bàrasdal òg,
'S Mac-'Ic-Ailean le 'sheòid nach géilleadh.
Iarla Chrompa, &c.

Clann-Ghriogair nan Gleann-
Buidheann ghiobach nan lann,
'S iad a thigeadh a nall na'n éight' iad.
Clann-Ghrigair, &c.

Clann-Mhuirich nam buadh,
Iadsan uile bhi uainn,
Gur h-e m' iomadaidh truaigh r'a leughadh.
Clann-Mhuirich, &c.

A Chlann-Dòmhnuille mo ghaoil,
D'am bu shuaicheantas fraoch,
Mo chreach uile! nach d' fhaod sibh éiridh.
A Chlann-Dòmhnuille, &c.

An fhuil uaibhreach gun mheang
'Bha buan, cruadalach ann,
Ged chaidh ur bualadh an àm na teugbhoil.
An fhuil uaibhreach, &c.

Dream eile, mo chreach!
Fhuair an laimhseachadh goirt,
D' an ceann am Frisealach gasda, treubhach.
Dream eile, &c.

Clann-Fhionnlaidh Bhraigh'-Bharr,
Buidheann cheannsgalach, àrd,
'N uair a ghlaoidht' an adbhans a dh'éireadh.
Clann-Fhionnlaidh, &c.

[TD 50]

Mo chreach eile, 's mo bhròn!
Na fir-ghasd' tha fo leòn,
Clann-Chatain nan sròl bhi dhéis-laimh.
Mo chreach uile, &c.

Chaill sinn Dòmhnall donn, suairc,
O Dhun Chrompa so shuas,
Mar ri Alasdair ruadh na féile.
Chaill sinn Dòmhnall, &c.

Chaill sinn Raibeart an àigh,
'S cha bu ghealtair' e 'm blàr,
Fear sgathaidh nan cnàmh 's nam féithean.
Chaill sinn Raibeart, &c.

'S ann thuit na rionnagan gasd'-
Bu mhaith, àluinn an dreach-
Cha bu phàigheadh leinn mairt 'n an éirig.
'S ann thuit, &c.

Air thùs an latha 'dol sìos,
Bha gaoth a' cathadh nan sian,
As an athar bha trian ar léiridh.
Air thùs an latha, &c.

Dh' fhàs an talamh cho trom,
Gach fraoch, fearann a's fonn,

'S nach bu chothrom dhuinn lom an t-sléibhe.
Dh' fhàs an talamh, &c.

Lasair theine nan Gall
'Frasadh pheilear m' ar ceann,
Mhill sud eireachdas lann 's b' e 'm beud e.
Lasair theine, &c.

Mas fìor an dàna g'a cheann,
Gun robh Achan 's a' champ,
Dearg mheirleach nan raud 's nam breugan,
Mas fìor an dàna, &c.

'S e sin an Seanalair mòr-
Gràin a's mallachd an t-slòigh,
Reic e 'onair 'sa chòir air eucoir.
'S e sin an, &c.

[TD 51]

Thionndaidh 'choileir 's a chleòc',
Air son an sporain bu mhò,
Rinn sud dolaidh. do sheòid rìgh Seumas.
Thionndaidh, &c.

Ach cuibheal nam feart thig mu'n cuairt,
Car bho dheas 's cha 'n ann tuath,
'S gheibh ar n-eascaraid duais na h-eucoir.
Ach cuibheal, &c

'S gu'm bi Uilleam mac Dheòrs'
Mar chraobh gun duilleach, fo leòn,
Gun fhreumh, gun mheagan, gun mheoirean géige.
'S gu'm bi Uilleam, &c.

Gu ma lom bhios do leac-
Gun bhean, gun bhràthair, gun mhac,
Gun fhuaim clàrsaich, gun lasair chéire.
Gu ma lom, &c.

Gun sòlas, sonas, no seamhs',
Ach dòlas dona mu d' cheann,
Mar bh' air ginealach clann na h-Eiphit.
Gun sòlas, sonas, &c.

A's chi sinn fhathasd do cheann,
'Dol gun athadh ri crann,
'S eòin an athar gu teann 'ga reubadh.
A's chi sinn, &c.

'S bidh sinn uile fadheòidh,
Araon sean agus òg,
Fo 'n rìgh dhligheach d'an còir dhuinn géilleadh.
'S bidh sinn uile, &c.

[TD 52]

AM PRIONNSA AGUS NA GAIDHEAL.

Le Alasdair Domhnullach.

AM PRIONNSA.

Mlìe mar'aisg air an t-saoghal,
'S carach, baoghalach a dhàil;
Cuibh'l an fhortain oirnn air caochladh,
Cha do chleachd sinn maoim roi' chàch;
Tha sinn a nis air ar sgaoileadh
Air feadh ghleann a's fhraoch-bheann àrd,
Ach tionailidh sinn fòs ar daoine,
'N uair a dh' fhaodas sinn gu blàr.

Misneach mhaith a mhuinntir ghaolach,
'S cumaidh Dia ruinn daonnan bàigh-
Cuiribh dòchas daingeann, faoilteach,
Anns an Ti a ni dhuinn stàth:
'S buanaichibh gu rioghail, aorach,
Traisgeach, ùir'neach, caoineach, blàth;
'S bithibh dileas 'chàch a chéile,
'S dùinear suas ar creuchdan bàis.

Ach 's fheudar dhomhs' a nis bhi 'falbh uaibh,
A Ghàidhealaibh calma mo ghràidh:
Bu mhòr m' earbsa as ar fòghnadh
Ged a dh'fhòghnadh dhuinn 's an àr;
'S iomadh ana-cothrom a choinnich
Sinn 's a' choinneamh bha gun àgh:
Ach gabhaidh mis' a nis mo chead dhibh'
Uine bheag, ach thig mi tràth.

Leasaichidh mi fòs ur call-sa,
A churaidhean gun fheall, gun sgàth;
Ur dillse dhligheach, rioghail, threuna,
'Dheanadh euchd ri uchd nam blàr:
'S ceann a's column chur o chéile
Mis' 's sibh féin a sgaradh fàs;
Ach togaibh suas ur misneach ghleusda,
'S cuiream féin ri 'r creuchdan plàsd'.

[TD 53]

NA GAIDHEIL.

A Mhuire sinn' tha air ar ceusadh!
Air dhi céille, 's sinn gun chàil-
Tèarlach Stiùbhart, Mac Rìgh Seumas,
'Bhi na éiginn anns gach càs:
Gur h-e sin a rinn ar léireadh,

Gur h-e 's fheudar dha gu'm fàg;
Sinn na dhéigh gun airm, gun éideadh:-
Falbh 'n ainm Dhé, ach thig a ghràidh!

Ar mìle beannachd ann ad dhéigh,
A's Dia ga d' ghleidheadh anns gach àit';
Muir a's tìr a bhi cho réidh dhuit-
Ar n-ùrnuigh gheur leat féin gach tràth;
'S ged a sgar mi-fhortan deurach
Sinn o chéile, 's ceum roi'n bhàs;
Ach soraidh leat a Mhic Rìgh Seumas,
'Shùigh ar céille thig le d' chàird'.

Chaill sinn ar stiùir 's ar buill-bheairte-
Thugadh uainn ar n-acair-bàis:
Chaill sinn ar cumbaisd 's ar cairtean,
Ar reul-iùil 's ar beachd gach là.
Tha ar cuirp gu'n chinn, gun chasan-
Sinn mar charcaisich gun stàth;
Ach gabh thus', a ghràidh gu t' astar,
Dean gleus tapaidh, 's thig gun dàil.

AM PRIONNSA.

Beannachd gu léir le Clann-Dòmhnuille,
'Sibh a dh' fhòirinn orm a'm' chàs,
Eadar eileanan a's mòr-thìr,
Lean sibh deònach rium gach tràth:
'S iomadh beinn, a's muir, a's mòinteach
A shiubhail sinn air chòrsa bàis;
Ach theasraig Dia sinn o fhuar-fhòirneart
Nan con sròn-ghaoth' bh' air ar sàil.

Sibh a rinn, fo laimh na Trianaid,
Mis' a dhion o mhi-rùn chàch;

[TD 54]

Mo dhearg nàimhdean neartmhor, lìonmhor,
Chuir an lion feadh ghleann a's àrd.
A mheud 'sa thaisbean sibh d' ar dillseachd
'S còir nach dich'nich sibh gu bràch;
A bhàrr gur sibh bu luaithe shìn rium
Taic' air tìr 's an talamh àrd.

NA GAIDHEIL.

Ochan! ochan! cruaidh an dearmad,
Bhi 'g ar tearbadh uait gun bhàs:
B' e 'n fhìor éibhinneachd, 's am beairteas
Bhi 'ga t-fhaicinn gach aon là.
Bidh ar ruisg làn tiom', a' frasadh-
Ar cridh' lag-chuiseach, gun chàil:
Gu'm pill thus' a rìs air t-ais oirnn-

Beannachd leat le neart ar gràidh!

AM PRIONNSA.

O! tiormaichibh-se suas ar sùilean,
'Chomuinn rùnaich fhuair ur cràdh-
Bidh sibh fathast maoiniach, mùirneach,
'N ur geard dùbailt' mu White-hall,
'N uair a bhios na reubail lùbach
Ri bog chrùban feadh nan càrn,
Gu'm bi sibhs' an caithream cùirte,
Uasal, lùth-chleasach, làn àigh.

MARBH-RANN DO PHRIONNS' TEARLACH.

Le Uilleam Ros.

Soraidh bh' uainn do'n t-Suaithneas bhàn,
Gu là-luain cha ghluais o'n bhàs;
Ghlac an uaigh an Suaithneas bàn-
'S leacan fuaraidh tuaim' a thàmh!

[TD 55]

Air bhi dhomh-sa 'triall thar druim,
Air Di-dòmhaich 's còmhlan leam,
Leughadh Litir-naigheachd leinn,
'S cha sgeul ait a thachair innt'.
Soraidh bhuan, &c.

Albainn aosd'! 's e fath do bhròin,
Gach aon mhuir bàit' tha 'bàrcadh oinn-
T' oighre dligheach bhi 's an Ròimh,
Taisgt' 'an caol-chist' lìobhta bhòrd!
Soraidh bhuan, &c.

'S trom leam m' osnaich anns gach là-
'S tric mo smaointean fad' o làimh-
Cluain an domhain truagh an dàil,
Gur cobhartach gach feòil do 'n bhàs.
Soraidh bhuan, &c.

Tha mo chridh' gu briste, fann,
'S deòir mo shùl a' riuth mar allt,
Ged a cheillinn sud air àm,
Bhruchd e mach 's cha mhisde leam.
Soraidh bhuan, &c.

Bha mi seal am barail chruaidh,
Gu'n cluinnte caismeachd mu'n cuairt;
Càbhlach Theàrlaich thigh'nn air chuan,
Ach thréig an dùil mi gu là-luan.
Soraidh bhuan, &c.

'S lionmhor laoch a's mìlidh treun,
'Tha 'n diugh an Albainn as do dhéidh,
Iad gu h-ìosal 'sileadh dheur,
Rachadh dian leat anns an streup.
Soraidh bhuan, &c.

'S gur neo-shubhach, dubhach, sgìth,
Do threud ionmhuinn anns gach tìr,
Buidheann mheamnach bu gharg clìth,
Ulamh, arm-chleasach 's an strìth.
Soraidh bhuan, &c.

[TD 56]

Nis cromaidh na cruitearan binn,
Am barraibh dhos fo sprochd an cinn,
Gach beò bhiodh ann an sràth na'm beinn
A' caoidh an co'-dhosgainn leinn.
Soraidh bhuan, &c.

Tha gach beinn, gach cnoc, 's gach sliabh,
Air am faca sinn thu 'triall,
Nis air call an dreach 's am fiamh,
O nach tig thu chaidh nan cian.
Soraidh bhuan, &c.

Bha 'n t-àl òg nach fac thu riamh
'G altrum gràidh dhuit agus miagh;
Ach thuit an cridhe nis 'n an cliabh,
O 'n a chaidil thu gu sìor.
Soraidh bhuan' &c

Ach biodh ar n-ùrnuigh moch gach là,
Ris an Ti is àird' a ta,
Gun e dhioladh oirnn gu bràth
Ar n-eucoir air an t-Suaithneas bhàn.
Soraidh bhuan, &c.

Ach 's eagal leam ge' maith a' chléir,
'S gach sonas 'gheallar dhuinn le 'm beul,
Gu'm faicear sinn a' sileadh dheur,
Airson an Suaithneas bàn a thréig'.
Soraidh bhuan, &c.

Cuireamaid soraidh uainn gu réidh
Leis na dh'imicheas an céin,
Dh'ionnsaidh 'n àit' an d' laidh an reul
'Dh'fhògradh uain gach gruaim a's neul.
Soraidh bhuan, &c.

'S bith'maid toilicht' leis na tha,
O na d' fhaod sinn bhì na's fearr;
Cha bhì ar cuairt an so ach gearr,

A's leanaidh sinn an Suaithneas bàn.
Soraidh bhuan, &c.

[TD 57]

DO NIGHEAN FEAR THIR-NA-DRISE.

Le Mac Fear Dhail-an-eas.

Tha mis' an so 'm laidhe
'N leabaidh chumhainn, chaoil, chlàraidh-
Tha mo cheann air a lionadh
Le fiabhras mi-nàdur';
Cha'n fhuachd, a's cha teas e-
Cha 'n 'eil fios ciod is cràdh dhomh;
'S ann tha toiseach mo ghalair
Mu m' sgamhan 's mu'm àirnean.

Thoir mo shoraidh-sa thairis
Gu m' leannan 's a' Bhràighe-
'S 'n uair a chluinneas i 'n aithris
Cha mhaith leath' mar tha mi;
Mi gun sùgradh, gun aiteas,
'S gur h-e chleachd mi bhi 'g àbhachd;
'S e bhi cumha do phòige
A leòn a chum bàis mi.

Ged bu shochdair mo leaba
Cha do chaideil mi 'n raoir,
'S nach d' fhuaras thu agam
Ann an taice ri m' thaobh;
'N àm dhomh dùsgadh 's a' mhaduinn
Bha thu fada o m' ghlaodh-
'S mòr a b' fheairde mi agam
Aon aiteal do m' ghaol.

Cha 'n e ro mheud do nithe
Tha mise ag iargain,
Ach mi 'm laidhe 'n so 'm aonar
Ri smaointinean diomhain;
Gheibhinn bean anns an tir so
'G am bheil nì, do shìol Dhiarmaid,
'S leis na thug mi do ghràdh dhuit
Gu 'm bi dàil aic' am bliadhna.

[TD 58]

Tha mise fo sprochd,
A ghaoil, o n' thòisich mo cheist ort,
'S their gach aon neach do m' sheòrsa
Nach bu ghòraiche bheag sin,
Mar gabh laigse na feòla
'S an òige mo leithsgeul;
Ach 's tri nith' thig gun iarraidh,

Gaol, eud, agus eagal.

Gur mis' th' air mo leòn
Mu mhnaoi òig a chùl duinn,
'S tu dheanadh mi slàn
Ged a tha mi gu tinn:
Tha do ghruaidh mar na caoran,
Do shlios mar fhaoilinn air tuinn—
'S e bhi sealltainn a' t' aodann
A b' aoibhniche leam.

'S truagh nach robh mi 's mo leannan
Ann 's a' ghleannan an uaigneas—
No 's a' bhadan bheag choilleadh,
Far an goireadh na cuachabh;
Thu sìnt' ann am bhreacan,
Dlùth paisgt' ann am shuainich—
Gu'm faighinn le deòin,
A ghaoil do phòg, a's cha b' fhuathach,

Gur diombach mi 't' athair,
Do d' luchd-taighe, 's do d' chàirdean—
Le an litrichean bréige,
Mar a thréig iad do ghràdh orm;
Bha 'n dream d' an robh sinne
Làn toil agus àrdain—
'S e ar cumail o chéile
Dh' fhàg fo éislean gu bràch mi.

AM FREAGRADH.

Ged a chaidh mo phòsadh
Cha bu deònach leam féin e;

[TD 59]

'N uair a sheall mi a'm' dheighidh
'S e mo roghainn a thréig mi:
Og ùr a chùil ghasa,
Bu tu mo thaitneach do chéile:—
'S truagh, a ghaoil, gun mi mar riut
Fo sparradh na déile.

Ged a thig m' fhear dhachaidh
Cha dean mi ris fàilte—
Cha dean mi ris cridhealas,
Bruidhinn, no gàire:
Tha e 'nochd 's a cheann iosal
'Fear nach do dhìreadh air fàilinn,
Dh' fhàg sud mise fo éislean
Fad mo ré a's mo làithean.

Tha mo chion air an fhleasgach

Dhonn leadanach, bhòidheach,
Do 'n fhine nach strìochdadh,
Do fhior-fhuil Chlann-Dòmhuill:
'S ann a ghabh mi mo chead diot
Aig an eaglais Di-dòmhaich,
'S ged nach d fhaod mi bhi cainnt riut,
Bha shannt na bu leòir orm.

Gur truagh nach robh mise
Gun fhios air do chulthaobh,
'N àm togail do lichde,
Agus bristeadh na h-ùrach:
Cha 'n iarrainn do chiste
Ach mo shlios a bhi dlùth riut-
Sgeul a sgath as mo cheudfaidh',
'S ann do 'n eug thug thu cunntas.

CUMHA CHLANN-AN-T-SAOIR.

Le Caiptein Paruig Mac-an-t-Saoir, R.M.

'S trom a tha m' inntinn, ri àbhachd cha bhi mi,
'S gach aon 's a cheann iosal bha dìleas do Chruachan.

[TD 60]

Tha Cruachan gu dubhach
A' cumha nan uaislean;
'S tiamhaidh torman a shruthan-
Tha 'choilltean air dubhadh,
'S tha 'eunlaith fo phuthar
'An dubhar a chruachan.
'S trom a tha, &c

Cò 'dhìreas an làirig
Do na b' àbhaist a cuartach'?
Tha Gleann-Nodha gun àiteach,
'S an Leitir 'na fàsach,
'S a fàrdaichean blàtha
'N an làraichean fuara.
'S trom a tha, &c.

'S ann shios 'an Aird-Chatain
Tha 'mhacraidh nan suanaich,
Fo stéidh nam ballachan cianail
'Tha 'n ceangal 's an iadh-shlait,
'S a cuiseagan tiamhaidh
'Sileadh dhiar air an uaighibh.
'S trom a tha, &c.

Cha 'n 'eil piob air na Casaibh,
No bratach a' gluasad,
'S tha Caol-charn nan glas-stuadh

Ag aomadh 's a' brachadh,
'S a dhaoine 's a' Chlachan
Fo ghlais nan clach fuara.
'S trom a tha, &c.

Tha thu, Aonghais, 'g am fhàgail,
An t-aon àgh tha ri m' ghualainn;
'S mi mar aon duine 'm fàsach,
Gun mhac no gun bhràthair;
'S am feasgar mo làithean
Cò 'chàireas a'm' uaigh mi?
'S trom a tha, &c.

Ach 'n uair thraoigheas an t-ailghios,
An t-àrdan, 's an t-uaibhreas,
Mu bhios Aonghas a làthair
Thig e dhachaidh gu 'chàirdean,
'S cha bhi mise 's an là sin
Gun bhràthair ri m' ghualainn.

[TD 61]

DO GHILLEASPUIG MAC-AN-T-SAOIR,
SGIOBAIR AN "LOCHGOILE."

Le D. Dughallach.

Gu ma slàn do'n Sgiobair bhàn,
"Hiri! Horò! nam b' àill leibh e;"
'S gu ma slàn do 'n Sgiobair bhàn.

'S leam gur h-aoibhinn an "Lochgoile"
'Bhi fo 'n Daoimean àraidh ud.
Gu ma slàn, &c.

'N uair thig àm dha dol g'a seòladh
'S lionmhor sròl 'bhios àrd oirre.
Gu ma slàn, &c.

Sròlaibh breaca, ballach, cean-fhionn,
'S luasgan mear g'am bàrr orra.
Gu ma slàn, &c.

'S grian na h-iarmailt 'maduinn chiatach
A' toirt sgiamh d'an àluinneachd.
Gu ma slàn, &c.

'S fhada chluinnear fuaim a luigheir
Mar ghuth buinne dàsachdach.
Gu ma slàn, &c.

'S crith gu h-obair air gach crois-alt
'Tha 'n a collainn àsuiageach.
Gu ma slàn, &c.

'S fhuasad 'aithneachadh aig Laimrig,
Cha bhi sgraing dhroch nàduir air.
Gu ma slàn, &c.

Gheibhear ceanalt' agus suairc' e
'Cur an t-sluaigh gu sàbhailte
Gu ma slàn, &c.

Air bòrd na h-iùraich 'steach le cùram,
'S le fìor ùidh a' bhràithreachais.
Gu ma slàn, &c.

'S mairg a theireadh nach robh eòlas
Aig an òigeir bhlàth-shuileach,
Gu ma slàn, &c.

Air sgiobaireachd chuantan citheach,
Caol no linne shàmhachair.
Gu ma slàn, &c.

Cha b' ann air luba ghrod nan tunnag,
Mar bha cuid do ghàrlaichean,

[TD 62]

A fhuair mo Sgiobair bàna a thogail,
Ach feadh osnaich àrd-thonnan.
Gu ma slàn, &c.

B'e 'mhaighstir-sgoil' an t-Iar-chuan sgreitidh
'Bheireadh leasain thàbhachdach.
Gu ma slàn, &c.

Bho òig' a lean'beachd b' e tuinn mheargant',
Làidir, mheamnach, àilgheasach,
Gu ma slàn, &c.

A thlachd bhi 'sgoltadh, le roinn fosghair,
Luchd an droma chàir-ghealaich;
Gu ma slàn, &c.

A thigeadh air o Choire-bhreacain,
'S frasachd shneachd 'cur càil annta.
Gu ma slàn, &c.

'S ullamh, ealamh théid do ghillean
Ann an iomairt ghàbhaidh leat.
Gu ma slàn, &c.

Bidh Uilleam, t'iùil-fhear, teoma, tùrail,
Aig an stiùir le h-àbaltachd.
Gu ma slàn, &c.

'S bidh Dòmhnall agad-sa 's an toiseach,
'Dheanadh t'fhorail nàistinneach.
Gu ma slàn, &c.

'S bidh Donnachadh gu dil a' feitheamh
'Dhol gu deas aig t' àithne-sa-
Gu ma slàn, &c.

'An cinnseal cumail ceart gach acuinn,
Mu'n tig sgar, no fàillinn annt'.
Gu ma slàn, &c.

Gu ma fad e 'treabhadh mara,
'S lunnan glasa, càsanach,
Gu ma slàn, &c.

Le Birlinn smùide chuireas dùr-thuinn
Air bheag lùigh fo 'n t-sàil aice.
Gu ma slàn, &c.

'S do Chlann-an-t-Saoir 'tòirt seòladh aotram
Thar nam maoltan bàn aca.
Gu ma slàn, &c.

Mo bheannachd leat, mar ghràdh o chéile,
'S guidheam féin nach bàthar thu.

[TD 63]

MOLLADH AN LEOMHAINN.

Le Alasdair Domhnullach.

Fàilt' an leòmhainn chreuchdaich,
Is eagsamhuil spraiçalachd,
'N uair dh'éireadh do chinn-fheadhna
Bu mheadhrach am brataichean,
'N uair chruinnicheadh gach dream dhiubh
Gu ceannsalach, tartarach,
Bhiodh pronnadh agus calldach
Air naimhdean a thachradh ruibh.
Iad gu h-oirdhearg air bhàr cora-ghleus,
Teinnteach, foir-dhearg, lasrachail,
'S àrd an stoirm air mhìre confhaidh,
'S lainn 'n an dorn ri spealtaireachd,
Le 'n geur cholg gu srachdadh bholg,
A' gearradh cheann a's chorpannan-
Cha shluagh gun chruaidh, gun cheannsal
Le 'n lann bheireadh fosadh orra.

Dùisg, a leòmhainn euchdaich,
'S dean éiridh gu faramach,
Air brat ball-dhearg bréid-gheal,
'S fraoch sléibhe mar bharran air-

Tog suas do cheann gu h-eutrom
'S na speuraibh gu caithriseach,
A's théid mi féin cho geur
'S a dh' fhaodas mi a'd' arabhaig.
Togam suas do mholadh prìseil,
'S do cheann rioghail, farasda;
Cha'n 'eil ceann no corp 'san rioghachd,
'An cruaidh-ghnìomh, thug barrachd ort-
An ceann cruadalach, àrd, sgiamhach,
Maiseach, fìor-dheas, arranta,
Is tric thug sgairt ri h-uchd an fhuath'is
Ri h-am luchd t'fhuath bhi 'tarruinn riut.

Cò b' urrainn tàir no dibl'eachd
Gu dilinn a bharalachadh-

[TD 64]

No shamhlaicheadh riut mi-chliùth,
A rìgh nan ceann barasach;
A chreutair ghasda, rìomhaich,
'S garg, fìor-dheas do tharruinn-sa,
Air brat glan do'n t-sìoda
Ri mìn chrann caol, gallanach.
E ri plapraich ri crann-brataich,
'Stalcadh chas gu h-eangarra-
'S còmhlain ghasda làn do ghaisgeadh
'Tional bras gu leanailt ris;
Fearg gu casgairt 'n an gnùis dhaite,
Fraoch a's fras gu fearachas,
Bhiodh sgrios a's lannadh sìos
Air luchd mi-ruin a bheanadh riut.

Cha robh gorta gleòis
Air an t'seòrs' o'n do ghineadh thu,
An dream rathail, mòrchuiseach,
Còmhragach, iomairteach;
Bu ghunnach, dagach, òr-sgiathach,
Gòirseideach, nimheil iad-
Bu domhain, farsuinn, creuchdach,
Cneidh euchdach am firionnach.
Iad gu sùrdail, 'losgadh fùdair-
Toit a's smùid o lasraichean;
Na fir ùra, gheala, lùghor,
'Ghearradh smuais a's aisinnean-
Lannan dubh-ghorm, geura, cùl-tiugh
'N glaic nam fiùran aigeantach,
A' sgoltadh chorp a sìos g'an rumpail-
Sùrd le sunnd air strachdaireachd.

'S foinnidh, fearail, làidir,
Cuanda, dàicheil, cinneadail;
Sliochd nan Collaidh làmh-dhearg,
'S iad làn do dh' àrd spiorad annta,

Cho dian ri lasair chrà'-dheirg
'S gaoth Mhàirt a' cuir spionnaidh innt'-
Gun mheang, gun mheirg, gun fhàillinn,
'N ar càileachd ged 'shirte sibh:

[TD 65]

Na fir chogach theid 's na trodaibh,
Nach biodh roi' lotaibh gioragach,
Nach iarr prosnach' ri h-àm cosgraidh,
A phronnadh chorp a's mhionaichean-
A sgathadh cheann, a's làmh, a's chas diubh,
Anns an toit le mire-chath-
Na fir bheura threun-fheardha,
Gheur-armach, fhineadail.

An cinneadh maiseach, treubhach,
Nan réidh chuilbhear acfhuinneach,
Nach diùltadh dol air ghleus
Ri h-àm feuma, gu grad mharbhadh;
Madaidh a's ùird ghleusda
Gu beumadh nan sradagan,
A conas dearg r'a chéile,
'Cur éibhlean gu lasraichean.
Frasan dealanach, dearg-pheilear,
'Teachd o'r teine tartarach,-
A' spadadh, 'pronnadh, a's a' leadairt,
Nan corp ceigeach, casagach;
Lannan dù-ghorm 'dol g'an dùbhlan,
'Gearradh smuais a's aisinnean,
Aig na treunaibh, cruaidh-bheumach,
'S luath bhualadh speachannan.

Clann-Dòmhnuille tha mi 'g ràtainn,
An sàr chinneadh urramach;
S tric a fhuar 's na blàraibh
Air nàmhaid buaidh-iomaineach-
Iad fearadha, tapaidh, dàna,
Cho làn do nimh ghuinideach
Ri nathraichean an t-sléibhe,
Le'n geur-lannaibh fulannach;
Iad gu sitheach, gleusda, cosluath,
Rùnach, bos-luath, fulasgach-
Cruas na creige, luath's na dreige,
Chluinntean fead am buileanan;
Na fir dhàna, lùth'or, nàrach,
Fhoinnidh, làidir, urranta,

[TD 66]

Cho garg ri tuil mhaoim-sléibhe,
No faloisg gheur nam monaidhean.

A charraig dhaingean, dhìleant,
Nach dìobair gun acarachd,
Gluais suas gu spòrsail, rioghail
Roi' d' mhìlidhibh gaisgeanta,
'S iad mire geal na cruadhach
Gun truailleadh, gun ghaiseadh iad—
'S bòcain a chur ruaig iad,
'Bheir buaidh le'n sluagh bras-bhuileach.
'S iomadh fleasgach cùl-bhuidh' dòid-gheal,
Is garbh dòrn a's slinneanan,
A dh'éireas leat 'an tùs na còmhstri,
A ni còmhrag mion-bhuilleach—
Iad gu bonn-mhall, bas-luath, cròdha,
Sàiteach, stròiceach, iomairteach,
A' dol a sìos 'an àm na teugbhoil,
'S leòmhan beuc' air mhir' aca.

A leòmhainn bheucaich, ghruamaich
'Bheil cruadail air tuinneachadh,
Is tric a dhearbh an cruaidh-chuis
'S na buan ruagaibh cumasgach;
'N uair a spealpta suas thu,
Le d' bhuidh ri crann fulannach,
Chite confhadh ruaimleach
'An gruaidhean a h-uile fir.
'S daingean, seasmhach, ranc do fhleasgach,
'N uair bhiodh deise tarrainn orra—
Cha toir eagal nàmhaid eag annt',
'S iad mar chreag nach caraicheadh;
'S glan am preas iad, chaoidh cha teich iad,
'S fiodh nach peasg do'n darach iad,
'S tric fhuair sibh air ur nàmhaid
'S na blàraibh buaidh chaithreamach.

Na'n tigeadh ortsa fòirneart,
Ga d' leòn o chrich aineolaich—

[TD 67]

Coigrich le rùn dòbheairt
Gu d' chòir thoirt a dh'aindeon diot:
'S iomad làn cheann Ileadh,
'S lainn lìobhta 'm beairt dhaingean annt'
'Thàirneadh suas ri d' shìoda,
Do t'fhior-fhuil gun tanachadh.
Fuirb'ean comasach nach cromadh
Roi' fhrois tholladh phearsannan—
Nach biodh somalt' dhol air chollainn
'N àm bhi sonnadh chlaigeannan—
Crunluath lomarra 'ga phronnadh
Air piob lonnaich, thartaraich,
A chuireadh anam anns na mairbh

A dhol gu feara-ghleus gaisge leò.

Stochd Chlann-Dòmhnuille dh'éireadh
Le'n geugan 's le 'm meanganan-
B' i sud a' choille cheutach
A b' eugsamhuil, 's bu cheannardaich';
'N uair thàirneadh iad r'a chéile,
Gach treubh dhiubh gu fearachail,
'S mairg a spioladh feusag
An leòmhainn, g'a ghreannachadh:
Bhiodh cinn a's duirn 'g an sgathadh dhiù'-san
Ann an dùiseal lannaireachd-
Fuil ri fear-iomachd 's ri srulladh
Feadh nan lub' 's nan camhanan;
Bhiodh lannan lotach, dù-ghorm,
'Cur smùidrich do cheannaibh Ghall,
A's caoidhrean truagh a's rànaich
'S an àrfhaich gu gearanach.

C'àit' am bheil 's an rioghachd
Aon fhear-gnìomh a thug barrachd oirbh;
No 'bhrosnaicheadh chum strìth sibh,
A mhìlidhibh bearaideach.
Na tuirinn sgairteil, phrìseil,
Do'n fhìor-chruaidh nach fannaicheadh-
Do 'm b' àbhaist a bhi dileas,
'S nach diobradh 'na ghealladh iad.

[TD 68]

Gadhair-chatha theid mar shaighead
Sios le'n claidh'ean dealanach,
Nach toir athadh, no dad athais,
Gus an sgath iad beallach rompa-
Cuirp 'g an sgathadh, 's cruaidh 'ga crathadh,
'S orra pathadh falanach,
Cluinnear fead ur claidh'ean,
Truagh ghàir agus langanaich.

Tha iomad mìl' an Albainn
Do gharbh fhearaibh fulasgach-
Sliochd a' Ghàidheil ghlais á Scota
Thig deònach m' ur cularaibh;
Gu'n tig iad le rùn cruadail
'S gu'm fuaigh iad gu bunailteach,
Ri teanachair gharg an leòmhainn,
'S r'a spògaibh dearga, fuileachdach.
Togaibh leibh gun airc, gun easbuidh,
Taom fheachd seasmhach, cunnbhalach,
Do laochraidh dheasa, shunndach, threiseil,
'Theid neo leisg 's an iomairt-sgleo-
Cha 'n fhacas riamh na suinn fo gheilt
A' dol 'an teas nan cumasgan:

Teichidh iad o' r stròicibh,
'S o' r sròlaibh breac, duilleagach.

GAISGEADH NAN GAIDHEAL 'S NA H-INNSEAN.

Le A Mac Alasdair.

Boineid a's it' agus
Breacan an fhéilidh,
'N deis' a tha sgiobalta
'Dhol anns an teugbhoil;
Boineid a's it' agus
Breacan an fhéilidh,

[TD 69]

'S Clanna-nan-Gàidheal
Ri guailibh a chéile.

Thainig sgeula gun mhearachd
A nall thar nan cuantan,
Mu threubhas nan gaisgeach
Nach tais ri h-uchd cruadail:
Luchd-dhìreadh nan creachan,
'S a shiubhal nan glas-chàrn-
Le 'n éideadh glan, gasda
'S an fhasan bu dual daibh.
Boineid a's it', &c.

Gur bòidheach an còmhlan,
'S gur seòcail a ghluaiseas
Luchd dhìreadh nam mòr-bheann,
'S luchd sheòladh nan cuantan:
Le sgiath a's le claidheamh,
Le gunna 's le daga-
Le 'n osanaibh ballach
'S bròg bhar-ial gun ghuag oirr'.
Boineid a's it', &c.

Bha iad ainmeil 's gach eachdraidh,
'S b' e cleachdadh an sinnsear'
'An àm bhi 's na blàraibh
Do nàmhaid cha strìochdadh:
Gu luath-lamhach, cruaidh-bhuileach,
Bras anns an ruaig iad,
Gu'n d' lean iad ri 'n dualchas,
'S cha chualas am mi-chliù.
Boineid a's it', &c.

'N uair sgaoilte leibh bratach
Ri crannaibh ré, dìreach,
'S a chluinntè gu tartarach

Caismeachd ur pìoban:
Cha chualas 's cha 'n fhacas
Aon fhin' air an talamh

[TD 70]

A sheasadh gun athadh
Roimh chrathadh ur pìcean.
Boineid a's it', &c.

'N uair thòisich na Sepoys
'S na h-Innsibh ri dò-bheairt-
Ri mort agus marbhadh,
Le an-ìochd gun tròcair;
'N uair ràinig na treun-laoich
Gu'n d' sgap iad o chéile.
'S gn'm fac' iad gu'm b' éiginn doibh
Géilleadh do òrdugh
Luchd bhoineid, &c.

'S iad na Réis'maidean ainmeil
Bha thall anns an uair ud-
Na Camshronaich Abrach,
'S na Cataich o thuath dhinn:
Clann-Choinnich Cheanntàile,
'S am Freiceadan Gàidhealach,
Gu'n d' dhearbh iad mar b' àbhaist,
'S gach àite, bhi buadhach.
Boineid a's it', &c.

Deoch slàinte nan gaisgeach
Gu h-ealamh mu'n cuairt i-
Le glainneachan stràchdte
'Dheoch làidir gun truailleadh:
Gach neach leis nach deònach,
Gu sunndach a h-òl as
Cha suidh e mu'n bhòrd leinn-
Gu'm fògair sinn uainn e.
Boineid a's it', &c.

NA FEARAIBH OGA.

'S meallt' an cridhe tha 'n an com
Aig na fearaibh òga;
'S milis an teanga tha 'n an ceann
A mhealladh gach òg-bhean:

[TD 71]

Ged a bhios e 'n diugh an geall ort,
'S e air thìth do phòsadh,

'S ann bhios e 'màireach ann na làimh
Air luing, 's i 'dol a sheòladh.
Ged a bhios, &c.

Ach òganaich a tha mi 'cumha
Dh' fhàg thu 'd diugh fo leòn mi!
Mheall thu mi mar mheall an t-ubhal
'Bhean bu mhotha sòlas-
Gus an do mhiannaich i le 'sùil e
'N dùil nach robh e neo-ghlan:
'S e 'meas bu bhuirbe chaidh a thoirmeasg-
Dh' fhàg sud searbh gu leòir e.
Gus an do, &c.

Nach cealgach dhuitse bhi ga m' chumail
Anns a h-uile dòchas?
Na'n géillinn-sa do d' bhriathran blasd'
Cha tigeadh dad ri m' bheò orm:
Na'n géilleadh! ach cha d' ghéill mi d' chainnt
'S gach gealladh ann toirt sòlais;
Ach 'n uair a theid mi as an t-sealladh-
" 'S coma leam an òinseach!"
Na'n géilleadh, &c.

N'am faiceadh sibh na fleasgaichean
Is deis' a théid an òrdugh-
Am fiùran 's bòidhche théid a mach
Bidh maighdean dheas an tòir air;
Ach dh'fhaoidte gu'm bi gaoid fo 'chois
Nach taobh ri bean a còta-
Mar bhuirb' an eas o'n gharbh-ghleann chas,
'Toirt oilbheum deas gu leòir dhi.
Ach dh'fhaoidte, &c.

Gur blasda, briathrach cainnt nan gillean
'Tighinn o'm bilean bòdheach:-
"Thréiginn mo chàirdean 's mo chinneadh,
'S cha tillinn ri m' bheò riu;

[TD 72]

A's shiùbhlainn leat, 's cha 'n iarrainn spréidh,
Na 'm biodh tu féin leam deònach!"
Tha 'cheilg a'd' bheul 'ga chur an céill,
'S e sud an sgeul tha còmhdachit'.
A's shiùbhlainn leat, &c.

'S mòr a tha do dh' amaideachd
'An aoradh na cloinn' òige,
'S cha lugha tha do 'n amharas
'N an caithe-beatha gòrach!
Bidh 'n teanga chiùin a' labhairt ruinn,
'S am beul o 'm binn thig còmhradh-

'S an cridhe fionnar fada uainn,
Cho luath ri gaillean reòte.
Bidh 'n teanga, &c.

Beannachd leat 's gun mhairg a'd' dhéigh,
A's taobh ri té is bòidhche;
Mu's tu féin a'd' ghealladh 'thréig,
'S nach mi do chéile deònach.
Mar bhàt air chuan, 's i 'tarrainn uainn,
'S luchd m' fhuath a' cur nan seòl rith';
'S do nàdur féin, mar ghaoth ro fhuar,
'S e 'tilgeadh uam a bhòichead.
Mar bhàt air chuan, &c.

MARAICHEAN NA H-ALBA, O'N BHEURLA.

Le A. M'I.

A mharaichean na h-Alba,
A dh' fhalbhadh leinn le gairm,
Fo'r brataich riabh bu dìleas,
A sheas ri strìgh 's ri stoirm;
Le sròl a' sranraich 'mach o thìr,
'Chur naimhdean sìos le buaidh,
Agus siùbhlaibh thar nan sùgh
'Nuair is gailbhich' smùid a' chuain,

[TD 73]

'S is fuaimneach, fada toirm a' chath',
'S is gailbhich' smùid 'a chuain.

Gu 'n eirich riochd nan treun- fhear
Mar éibhlean o gach tonn!
O 'n uaighibh uaine sàil',
Air 'm bu bhlàr dhoibh clàir nan long;
'S far 'n deachaidh Nelson treun do'r dìth.
Gu'n las gach cridh' gu'r gruaidh,
'Dol gu siùbhlach thar nan sùgh,
'Nuair is gailbhich' smuid a' chuain;
'S is fuaimneach, fada toirm 'a chath',
'S is gailbhich' smùid a' chuain.

Cha 'n fheum ar dùthaich daingnich',
'S tùr-chaisteil chrann m'a tràigh,
'S ur siubhal-s' air na sléibhtibh cuain
'S ur dachaidh buan air sàil'
Le tàirneanach o'r darach cruaidh,
Theid tuinn a chlaoidh gu suain,
'S iad a' rànaich gu tràigh,
'Nuair is gairbhe gàirich cuain;
'S is fuaimneach, fada toirm a' chath',

'S is gairbhe gàirich cuain.

A' bhratach bhoadhar, Bhreatunnach,
Gu'n leum 's gu'n las r'a crann,
Gus 'dean uainn' oidhche 'chruadail triall,
'S reul-sìth' gu tìr nam beann.
Bidh sin, a gaisgeach' fairge!
Ar ceòl 's ar cuirm le 'r buaidh,
'S fuaim ar ciùil bidh mu'r cliù,
'Nuair dh' fhàsas ciùin' air cuan;
'S gun tuillidh toirm no teine cath',
Gun strìgh gun stoirm air cuan.

[TD 74]

CUMHA DO LEANABH GILLE.

Le A. Mac Laomainn

Gur mis' tha fo mhulad
Air m' uilinn 's mi 'm ònrachd,
'S mi 'caoineadh an lurain,
Tha mi uime ro bhrònach;
O 'n a chaidh thu 's an tulaich,
'S am bheil tuille do d' sheòrsa,
Gur h-e sgeula mo dhunaich
Nàch d' fhuirich thu, Dhòmhnuille.

'S gur h-oil leam a thachair,
Gu'n do ghlacadh cho òg thu,
Leis an teachdaire dhàna,
Gun chàirdeas do m' dhòruinn;
Thug á broilleach do mhàthar
Thu, a ghràidh, gun chead còmhradh;
O! gur mis' th' air mo chràdh-lot,
O 'n là chàireadh fo'n fhòid thu.

Ormsa rug an fhras ghàbhaidh,
'N uair a chàireadh air bòrd thu-
Ann ad bhradan geal lamh rium,
Gun chàil ann ad chòmhradh;
Gur h-i Nollaig mo ghreadaidh
A leag mi le dòrainn,
O 'n là chuir iad thu sìnte
Anns a' Chill, fo na fòidean.

Bha mo chion air an leanabh
A dh' fhàs gu ceanalta, mòdhar;
Riut a thogadh mo chridhe
'N uair a thigeadh tu 'm chòdhail:
'S tric a rinn mi riut mireag,
Gu h-iollagach, ceòlmhor-
Leam, a luaidh, gu'm bu mhilis

Bhi gu minic ga d' phògadh.

[TD 75]

Gu'm bi sud an t-sùil àluinn
Bh 'aig mo phràpanach bòidheach-
Beul bu mheachaire gàir' thu,
Pòg mur fhaile na 'n ròsan;
O d' shàiltean gu d' mhullach,
Bu leat urram na h-òigridh,
'S na 'm faigheadh tu saoghal,
Bu tu gaol na 'm ban òga.

Bu tu m' abhull a's m' ùbhlan,
'S bu tu m' ùr ros an gàradh,
Bu tu mo chaineal 's mo shiùcar,
Mo chruit chiùil 's m' aobhar ghaire-
Bu tu m' aighear 's mo shùgradh,
'S bu tu 'n ùr ghibht a chràidh mi,
O 'n là chuir mi fo 'n ùir thu,
Tha mi brùite fo 'm àirnean.

Gur tric a' tigh'nn am aire
A liuthad car a bha d' làmhan,
Do lùth-chleasan beadrach,
Ri cleasachd a's àbhachd;
'Nuair a dheanainn do ghlacadh,
Gu t-altrum, o d' mhàthair,
Bhiodh mo chridhe lan aiteis,
'Bhi macnus ri m' ghràdh-sa.

'S cha n' e t 'fholachd, no t' uaisle,
A ghluais thun an dàin mi,
No tlachd a bhi 'g innseadh
Mu d' dhìslean, 's mu d' chàirdean;
Ach a thoileachadh m' inntinn
Mar chuimhneachan bàis ort-
Los gu'm faicinn, a rùin ghil!
Do ghnùis mar 'an sgàthan.

C' uime tha mi cho gòrach
'S a bhi brònach 'ga d' thuireadh,

[TD 76]

O 'n 's e 'n Ti is fearr còir ort
Thug dhuit òrdugh air imeachd,
Dh'fhois na h-ùrach d'am buin thu,
'S an duslaich o'n d' thàinig;
'S an t-anam gu rioghachd
An Ti a thug fàs dha.

Ged a tha mi 'n so 'làthair
Ann an sgàile na feòla,
Agus thusa gu sàbhailt'
Còmh'l' ri h- Abr'am 's r'a chòisridh,-
Tha mo dhùil anns an t-Slàn'ear
Gu 'n tàr e sinn còmhladh,
Chum cliù thoirt do'n Ard-Rìgh
Ann am Phàras na glòire.

Tha mi nis 'an tiom sgur dhiot,
O 'n a chuir mi thu còmhl' ri
Do pheathraichean àluinn,
'S do bhràthair bha bòidheach;
Ach na'm faighinn-sa m' àileas
O ghràsan na tròcair,
B' e mo mhiann bhi riut sìnte
'N uair a chrionadh am fòid mi.

ORAN AN IASGAIR.

Hò mo bhàta laghach
'S tu mo bhàta grinn,
Hò mo bhàta laghach
'S tu mo bhàta grinn,
Hò mo bhàta laghach
'S tu mo bhàta grinn,
Mo bhàta boidheach, lurach
'Thogadh taobh Loch-fìn'.

'Sud a' chungaidh 'chàireadh
'M bàta 'choisinn buaidh,

[TD 77]

Druim de'n leamhan ruighinn
'N sàs 's an darach chruaidh,
Fiùghanan, 'us ùrlar
Sùgha, fallain, buan,
Giubhas glan na Lochluinn
Fuaight' le copar ruadh.
Hò mo bhàta, &c.

B' àluinn air an tràigh i
Mu'n deach' i air sàil'-
A leagail cho bòidheach
Air gach dòigh a'm b' àill,
Urlar glan gun chaise-
Saibhir, làn m'a bràigh'-
Suighean dlùth ga dùnadh-
Cuimir cruinn gu h-àrd.
Hò mo bhàta, &c.

B' àluinn i 'na h-uidheam
Mach 's a' chalamh chiùin
Fèath nan eun mar sgàthan
D'a croinn àrd 's d'a siùil,
Eòin na mara aoibhinn,
'S mar le farum ciùil,
'G itealaich mu'n cuairt dhi
'Cur an céill a cliùth.
Hò mo bhàta &c.

Bu thogarach mo bhàta
'Mach air aghaidh cuain,
'N uair thigeadh oirnn le caitein
'A ghaoth sgaiteach, chruaidh;
'S ann an sin, air thoiseach,
Choisneadh tusa buaidh,
'G iarraidh suas ri fuaradh,
'S cronan binn fo d' chluais.
Hò mo bhàta, &c.

'Nuair dh' éireadh i 'na meallaibh,
'S thigeadh oirnn le gàir,

[TD 78]

Na cnapan àrda, geala,
'S cìrein air am bàrr,
'S tusa thilleadh uait
Na stuaghan ribeach, àrd,
Rathad aca, 's agad,
'S cha fhliuchadh tu clàr.
Hò mo bhàta, &c.

'N uair thigeadh i 'na grìosaich
'Nuas o shliabh nam beann,
Sìobain gheal' ag éiridh
Suas mu bhàrr nan crann,
'S tusa 'sin nach géilleadh;
Ach ga h-iarraidh gann,
'Shadadh i bho chéil'
'N a caoirean dearg mu d' cheann.
Hò mo bhàta, &c.

Sud an té nach diùltadh
Tilleadh 'nuair a b' fheum;
'S tu 'thigeadh le sìnteig
'Nuair a dh'iarrainn féin,
Do sheòl-cinn mu d' chluais—
Mu'n cuairt bhiodh tus a'd' leum,
Cliathach eile fodhad,
'S cuartag chruinn a' d' dhéigh.
Hò mo bhàta, &c.

Fhad 's is maireann dòmh's
Mo bhàta boidheach, grinn,
'S fhad 's a chaomh'near slàn
Na gillean gleusd 'tha innt',
Ged a tha mo dhachaidh
Air a chladach luim
Gheibh mi lòn, 'us stòr
A grinneal gorm Loch-fìn'.
Hò mo bhàta &c.

[TD 79]

BROSNACHADH BHRUCE, O'N BHEURLA.

Le A. M'I.

'Threun' 's tric le Wallace 'dh' fhuiling creuchd!
'S fo Bhruce chaidh dàn' gu àr nan euchd!
Nis iarraibh hàs am blàr nam beum,
No buaidh gu treun 's an strìth!

So latha 'chruais-an uair tha là'ir!
Feuch feachd fo'n cruaidh air cluan an àir!
A' teachd le'n uaill gu buaireas blàir!
A dheanamh thràilleas dhibh!

Cò thig do'n strìth neo dhìleas, claon?
Cò dh'iarraidh uaigh ach cluan an raoin?
Cò strìochdadh sìos gu dìblidh, faoin
Air cùl nan claon-fhear clìth?

Cò 'n càs a rìgh, a riogh'chd 's a reachd,
Bheir beum nan geur-lann treun an gleachd
Gu buaidh a'm blàr no bàs 'na bheachd,
An gaisgeach leanadh mi.

Ar truaighe 's teinn, ar n-ainneirt chruaidh,
'S ar sliochd an sàs nan tràillibh truagh';
O'r cuislibh tràight' air sgàth ar sluaigh,
Thig saorsa bhuan le sìth!

Biodh uaibhrich sleuchdt' fo'r beuma bàis;
Fear ainneirt dh'eug 'n uair ghéilleas nàmh,
Tha saorsa fhéin a'm beum 'ur làmh,
'Ar n-aghaidh-buaidh no bàs san strìth!

COMHAIRLE DO NA GILLEAN OGA.

Le A. Mac Cuarraig.

Horo Iain taobh rium fhin,
A's na bi 'strith ri h-amaideachd,

[TD 80]

Feumaidh mnathan uaisle Tì,
'S gur goirt an cinn mar faigh iad e.

Tionndaidh rium a's leugh a' chòir,
Tha mise deonach teannadh riut,
Mu's olc no math 'g am bi mo dhòigh
Cha chluinn na h-eòlaich gearan uam.
Horo Iain, &c.

Cha'n iarr mi siùcar no Tì-
Sròl no sìod' a cheannach dhomh,
'Si obair mo dhà laimhe fhin
Is cinntiche mi leanailt rium.
Horo Iain, &c.

Gabh thusa Iain a mhuir làn,
Mar phàtaran s' cha'n aireach dhuit,
Ge b' e cho fhad sa théid i 'n àird
Gu'm faic thu'n tràigh an eal'achd ann.
Horo Iain, &c.

Sin mar bhitheas luchd na stràichd,
Le'n curaichdean àrd 's le 'n cailleaguth,
Ni 'm pòsadh bochd an toirt gu làr,
Mar shneachda bàn na gaillinne.
Horo Iain, &c.

An riomhadh 'cheannaicheas iad gu daor,
An saoghal bheir e'n car asda,
Bidh gùnn a's gùnn ga'n cur fa sgaoil,
Gu h-aodach do na caileagan.
Horo Iain, &c.

'N uair theid iad a mach gu féill,
Gur gann dhuit té dhiubh aithneachadh,
Gu'n searg iad mar ni ròs na géig,
Ri teas na gréin a dh' fhannaicheas.
Horo Iain, &c.

"An uaisle bhoichd gun chas gun làmh,"
Tha'n dàn mar dh'fhàg an sean-fhacal,

[TD 81]

"Cha chuir e salann air a' chàl,"
Bi t-fhaicill trà' mu'n lean i riut.
Horo Iain, &c.

An uaisle, 'bhoichdainn, a's an spòrs,

Nan triùir a chòir na h-amaideachd,
Ma gheibh a cheathrar ud ort còir
Gur maireag bean òg a leanas riut,
Horo Iain, &c.

'Nuair thig am bothan le 'chraos cam,
Am màl, 's a' chlann, 's a' cheannachd ort,
Bu taitneach dhuit a bhean 'san àm sin
'Thairneadh ceann an amuill dhuit.
Horo Iain, &c.

Bu mhath do bhean a bhi gun spòrs,
Gun mhoit, na pròis, na, h-eallaich oirr',
Ma bhitheas an t-airgiod pailt na pòc'
Tha h-uile glòir a leanailt ris.
Horo Iain, &c.

An deise mharcachd gun an t-each,
Co àrd nam beachd 's co amaideach,
Cha'n ioghnadh cogadh agus plàigh
Bhi anns gach àit an tachair iad.
Horo Iain, &c.

Na ruffles gun sgillinn 'sa phòchd',
Na brògan 's linnigh anairt annt;
'Toirt iasad á sgiath gach eòin,
'Se 'n dòigh am faod thu 'n aithneachadh.
Horo Iain, &c,

Tha 'n dreòlan donn ann as na h-eòin,
An iolair mhòr 's an eala ann-
Tha 'n sgiathan féin a réir gach seòrs'
A leum 's an dòigh am maith dhoibh e.
Horo Iain, &c.

Tha thus' a's mise 'réir a chéil'-
Ar n-òr, ar spréidh, 's ar seanairean;

[TD 82]

'S mu gheibh mi each a ruith na réis
Cho luath riut féin, nach lean mi ris.
Horo Iain, &c.

Do 'n uaisle cha tugainn beum
Na h-àite féin, 's cha teannain ris-
Cha chliù, 's cha ghliocas dh'fhear gun spréidh
Bhi fòirneadh té a dh'aindeòin diubh.
Horo Iain, &c.

DO BHATA THIGHEARNA CHOLA.

Le Iain Mac Ghilleain.

Cha dean mi 'n diugh fàilte
Ris a' bhàta so 'tighinn,
Bho nach bitheadh mo ghràdh oirr'—
Fear àrd a' chuil bhuidhe:
'Sin an tighearna dùchadh
Chuireadh sunnd air mo chridhe,
'N uair a bhiodh e 'ga stiùradh,
An àm na siùil a chur rithe.

An àm na siùil a chur rithe,
Bhiodh e 'na shuidhe 'ga stiùradh,—
'S e b' urrainn a seòladh
Gu còrsa na dùchadh:
B' e sin sgiobair a' bhàta,
'S i air bhàrr nan tonn dù-ghlas,
Gu gleidheadh an fhuaraidh
'S i 'ruith suas air gach sùgh dhiubh.

'S i 'ruith suas air gach sùgh dhiubh,
'S gu'm bu shunndach a h-astar,—
'N uair a rachadh i 'n òrdugh,
Le còrcaich mar acfhuinn;
Steigh a's cupail mhath, làidir,
Deadh chàbuil a's acair,—

[TD 83]

'S iad a' tarraim nam ball sinn,
'S fir air ceann gach aon slaite.

Fir air ceann gach aon slaite,
An uair a phaisgte 'cuid aodaich,—
An àm an caladh sin fhàgail,
Bhiodh iad-san ga sgaoileadh—
'N uair a thogadh i 'sghiathan
Bhiodh a cliathach ri saothair,—
Cha bhi 'n sgiobar fo chùram
Ged a lùb e 'croinn chaola.

'S e gu'n lùbadh croinn chaola,
'S a bheireadh aodach bho 'slatan;
Bu leis urram a stiùraidh
Gu gleidheadh cùrsa mar chaiptein:
'N àm dha suidhe 'na chèabain,
'S a thàirneadh e 'chairt ann—
Bha e eòlach 's gach àite
'S an d' thigeadh bàta gu h-acair.

Cha 'n 'eil àite an d' théid acair,
Ann an caladh n'am beaigh,
Nach fhaic e mu choinneamh

Glan, soilleir, 's nach leur dha:
'S tu bheireadh i sàbhailt'
Thar bàrr nan tonn beucail-
'N uair a thig a' mhuir ghàbhaidh,
Bhiodh do làmh 's a' chrann chéilidh.

Bhiodh do làmh 's a' chrann chéilidh,
Bu mhòr t' fheum air 's an àm sinn;
'S i dh' fhalbhadh gu siùbhlach,
'S an riof cùil a bhi teann innt'
Bho ghuallainn gu sliasaid,
'N uair a dh'fhiaradh tu'n ceann i,
'S deas a thig i mu'n cuairt duit
Ann am fuar shruth nam beann ud.

Ann am fuar shruth nam beann sin,
Ged bhiodh greann air gach linne,-

[TD 84]

Na'n gleidheadh i 'n criù dhuit
Cha b' fhiù leat a tilleadh;
Ruith choip air gach bòrd dhi
'S tu 'toirt òrduigh' do d' ghillean-
'S i ghluaiseadh gu meamnach,
'S i 'cur fairge fo 'slinnein.

'S i 'cur fairge fo 'slinnein,
Gu mireagach, bòidheach;
'N uair a gheibheadh i h aodach
Bhiodh i aotram, gun mhòrchuis,-
Bhiodh a toiseach 'sa gualla
Ri bualadh nam bòc-thonn;
'S i gu'n sgoilteadh o chéile
Gach aon diubh leumadh 'na còdhail.

A h-aon diubh 'leumadh 'na còdhail
Bhiodh i 'n connsachadh cruaidh rith',
'S i gu h-àrdanach, aotram
'N uair a dh'éireadh i suas orr';
Gu'm bu bhinn leis an crònna
A bhiodh ri bòrdaibh a fuaraidh;
'S i gu'n gearradh le séirein
'S iad ag éiridh le nuallan.

'S iad ag éiridh le nuallan,
Ann sa chuan a bhiodh fiadhaich,
Far an deanadh iad dùsgadh,
Bho 'n ghrùnnd a bhiodh iargalt,
Anns na sruithean bu làdir',
Ged 'bhiodh bàilin gun chiall ann
Gu'n deanadh i fhàgail
Gach bàt' théid g'a feuchainn.

Cha deach' bàta g'a feuchainn
A dheanadh oirr' buidhinn,
'N uair a theid i le h-àlach,
Na h-àsuig fo uidheam-
'N uair a sgaoileadh i 'cleòca,
'S a bhiodh a sgòid ann an ruigheadh,
'S i dh' iarradh gach seòladh,
'S gu'n i còmhnard 'na suidhe.

[TD 85]

Gun i còmhnard 'na suidhe,
'S i ri guidhe na gaoithe,
'N uair a bhiodh i gu fulang,
Air a h-uilinn ri gaoirich;
'S iad a b' fhiach, thar gach duine,
Fhaotainn urram nan saoraibh,
A rinn a suas i cho ciatach
'S nach liath leis an aois i.

Cha liathar le h-aois i,
'S cha chaochail i coltas,-
Bu mhath leagadh na fiubhaidh
Bha na h-urlar cho socrach:
Am fear a rinn as a h-ùr i,
'S a dhlùth i le 'locair,
Cha robh sgar dhith gun sùgh air-
Leig e bùird thar a lotaibh.

Leig e bùird thar a lotaibh
Mu'n deanadh postadh e fhaotainn,
Anns na cuartagan dù-ghlas,
'Thig le bùirein m'a h-aodan;
Aig feothas a dlùthaidh
Bheir i cliù do na saoraibh-
Ged a bhiodh i 'muigh ràithe
Cha téid làmh 'na pìob-thaosgaidh.

Cha téid làmh 'na pìob-thaosgaidh
Bho 'n tha saorsainneachd ghasd' oirr';
Cha 'n 'eil calp innt' gun lann air,
Mu'n ceann air a chalcadh-
Gach reang 'bha 'na cliathaich
Ris a' bheul air a sgathadh,
'S math a shnaidh e le thàl i,
Ann an tàthadh a saithean.

'S ro mhath thàthadh a saithean,
'S i gun athadh do chuantan,-
Deadh ghreim aic' 's an t-sàile
Eadar shàil agus ghuallann:

[TD 86]

Tha gach maide 's an iùbhraich
Cho cumta mu'n cuairt di
'S ged a bhiodh i 'ga tionndadh
Car ùin' a'm beairt tuairneir.

DUIL RI BAILECHAOLAIS FHAICINN,
Air a' cheud là do'n Fhogharadh, 1856.

Le Iain Camshron.

AIR-<eng>"Johnny stays long at the Fair."<gai>

LUINNEAG:

O chi! chi mi na mòr-bheannaibh;
O chi! chi mi na còr-bheannaibh;
O chi! chi mi na coireachan-
Chi mi na sgoraibh fo cheò.

Chi mi gun dàil an t-àit' 's an d' rugadh mi,
Cuirear orm fàilt' 's a' chainnt a thuigeas mi;
Gheibh mi ann aoidh a's gràdh 'n uair ruigeam
Nach reicinn air thunnachan òir.
O chi! chi, &c.

Chi mi a' ghrian an liath nam flaitheanas,
Chi mi 's an iar a ciar 'n uair luidheas i;
Cha'n ionnan 's mar tha i ghnàth 's a' bhaile so
'N deatach a' falach a glòir.
O chi! chi, &c.

Gheibh mi ann ceòl bho eòin na Duthaige,
Ged a tha'n t-àm thar àm na cuthaige;
Tha smeòraichean ann is annsa guth leam
Na pìob, no fiodhal mar cheòl.
O chi! chi, &c

Gheibh mi le liontan iasgach sgadain ann-
Gheibh mi le iarraidh bric a's bradain ann;

[TD 87]

Na'm faighinn mo mhiann 's ann ann a stadainn,
'S ann ann is fhaid' bhithinn beò.
O chi! chi, &c.

Chi mi ann coilltean, chi mi ann doireachan,
Chi mi ann màghan bàn is torraiche,
Chi mi na féidh air làr nan coireachan,
Falaicht' an trusgan do cheò.

O chi! chi, &c.

Beanntaichean àrd is àilidh leachdainean,
Sluagh ann an còir is còire cleachdainean,
'S aotram mo cheum a' leum g'am faicinn,
A's fanaidh mi tachdan le deòin.
O chi! chi, &c.

Fàgaidh mi ùpraid, sùrd a's glagarsaich,
Dh' fhacinn na tìr an cluinnt' a chagarsaich,
Fàgaidh mi cùirtean dùinte, salach,
A dh'amharc air gleannaibh nam bò.
O chi! chi, &c.

Fàilt' air na gorm mheallaibh, tholmach thullachnach,
Fàilt' air na corr-bheanna mhòra, mhullanach,
Fàilt' air na coilltean, fàilt' air na h-uile,
O! 's sona bhi 'fuireach 'n an còir.
O chi! chi, &c.

RANN DO'N RATHAD IARUINN,
Anns am bheil an t-Inneal tarruinn air a choimeas ri Each.

Leis an aon cheudna.

FONN—"Beinnibheis."

Bha mi 'n dé leis an Each-iaruinn,
'S gu dearbh cha 'n iarraim rithisd 'fhaicinn;
Chuir e orm a leith'd do dh' fhuathas
'S gu'm bi uamhas orm car seachduin:
'Leithid cha 'n fhacas 's cha chualas
A bhi 'gluasad air fòid Bhreatuinn,—
Tubaisd air an tìr rinn 'àrach
Ged b' ann 's a' Ghàidhealtachd a bheirt' e.

[TD 88]

'S cinnteach mi gur beag a chaoimhneas,
'S gur iomadh sgaoim a tha e 'gabhail—
'S nach seachnadh e, ged b' e 'm pàisde
Bhiodh a' màgran air an rathad:
'S mairg a gheibheadh breab d'a shàiltean
Ged robh stàilinn air a bhathais;
'S ann bhi 'labhairt air 'n a luathas,
Tha e luath ged 's ann air 'athais.

Cha ruig e leas ach tearc a bhiathadh,
A's cha ghabh e siol no cònlach;
Cha chrom e 'cheann 's cha chuir e beul
Ged robh e 'dol roimh fheur 's roimh fhòlach:
Ma gheibh e deoch an dràs 'sa rithisd,

'S mulchdan dubha 'chur 'na sgròban-
Ni leth choltach ris a' ghual
A chuir air fuadach uainn a' mhòine.

Cha 'n iarr e cuinng a chur m'a mhuineal-
Cha 'n iarr e drumanach no sìnteach;
Cha 'n iarr e srian, no taod g'a stiùradh,
'S cha 'n 'eil cùram 'na dhol dìreach:
Cha deachaidh briogais riamh m'a mhàsan-
Amullan cha bhiodh e 'strì riu;
Earball féin nach d' fhàilnich riamh,
A's slabhraidh iarunn, na tha dhi air.

'N uair a chuirear anns a' bheairt e,
Fanaidh e car tacain sàmhach,
Gus an labhair am fear-iùil ris,
'Th'air a chùlthaobh 's e 's an àinich-
'Anail féin aige g'a mùchadh,
Gus am bheil a bhrù cho làn di,
'S i a' spùtadh mach troimh 'chluasan,
'Chor 's gur h-uamhas a bhi làmh ris.

'N uair bhitheas gach ni an òrdugh-
'N sluagh 'n an cròil'leanan 's na feunaibh-
Beanaidh 'n t-iùil-fhear ris 's a' chruachan,
'Sa thiota' gluaisidh 'n cruaidh-each, steudach:
'S ann an sin a bhios an ùspairn,
Air a ghlùinean 's air a shléisdean-

[TD 89]

Meud an lòid a tha e 'slaodadh,
Cò a shaoileadh leis gu 'n téid e?

Ach ged 'chuireas e seal spàirn air
Cha 'n e 'nàdur chaidh gu'n géill e;
Gluaisidh e na lùithean làidir,
Ritheach, cràcach, cnàmhach, féitheach:
Meud na spàirn a' cur na smùid deth-
'Anail brùchdaidh e 's na speuran,
A's bheir e sitir as cho cruaidh
'S gur cùis-uamhais do neach éisdeachd.

'S 'n uair a théid e ann a shiubhal
'Anail puthaidh e 's na speuran-
Uair cho dubh ri deathach àmhuinn,
'S uair mar cheò a' Mhàigh air sléibhtean:
Bheir e sitir as a rithisd,
'S ciod an sin a chuireadh éis air?
Mar a luath's is amhluidh 'spionnadh-
Gur cùis iongantais gu léir e!

'S ann an sin a bhios am fuathas,

Toirm nan rothan, fuaim nam feunaibh!
Ciod air thalamh 'tha cho luath ris—
Ciod 's a' chuan, no anns na speuran?
Stoirm a' Mhàirt cha chum air sealladh'
Gaoth no doinnionn cha chuir éis air;
Mar 'eil an dealanach na h-aon ann,
Ciod 's an t-saoghal 'chuireadh réis ris?

Chi thu craobhan, chi thu coilltean—
Chi thu aibhnichean a' tréigsinn;
Chi thu achaidhean a's raointean—
Chi thu aonaichean a's sléibhteann;
Chi thu bailtean ann am plathadh—
Amhuil gealach ri h-àm séididh;
Thu 'dol seachad orr' cho luath a's
Gur a brудар dhuit gu léir e.

'S coingeis leis ciod e an rathad
Ni e ghabhail leis na feunaibh;
Oir cumaidh e a ghabhail dìreach,
'S cha 'n 'eil ni a chuireas éis air:

[TD 90]

Cha chuir càthar, cha chuir mòinteach—
Cha chuir lòintean air-san éigin—
Cha bhac aibhnichean a chùrsa,
'S cha 'n 'eil cùram dha gu'n géill e.

Uair a tolladh troimh na bruachan,
E 'g an spuacadh bho a chéile;
Uair fodha, 's uair an uachdar—
Uair a' dol troimh chruaidh nan sléibhteann—
Uair a' dian ruith shios fo'n talamh—
Uair 's an athar tha e 'g éiridh;
Uair a' tolladh fo na tigheann—
'S uair thar bhailteann tha e 'leumnaich.

'N uair bhios e 'dol troimh na creagan,
Gur cùis eagail thar gach ni e;
Toirm mar sgàirneach o'n Cheum-éigin,*
'S tuil a' reubadh chreag 'n am mìrean:
Mar chomhthional nan tàirneannach,
Oidhche ghàbhaidh 'n Gleanna-Comhunn;
Na sradan drisleach thig o 'chruidheann
Mar sholus iùil dha féin gu'm foghainn.

'N uair a chaillear e 's na beanntan,
Cluinnear sluagh a' cainnt r'a chéile:—
"Saoil an tig e tuille 'n uachdar?
Mo thruaigh' an sluagh a th'anns na feunaibh!"
Ach togaidh e a cheann bho 'n talamh,
'S crathaidh e dheth sal nan sléibhteann;

A mhluidh sgarbh am measg nan tonnan,
'S coingeis doinnean no muir réidh leis.

'S 'n uair a thig e dlùth do bhaile
Bheir e sgail as a bhios oillteil;
'S cinnteach mi gu bheil e pàiteach,
'N déigh a rànaich a's a sgaoimrich;
'S cuirear strup cho garbh ri duine,
'Sios 'na shlugan, mar shruth aibhne;

* "Ceum-éigin," beinn ann an Gleann-Comhunn a th'air caitheadh le sgrìodan, gus am bheil i air fàs cho tana 's gu'm faodar a marcachd-cha 'n 'eil dòigh eile air faotainn eachad.

[TD 91]

Olaidh e an sin a shàth dheth,
'S cha bheag an làn a tha 'n a bhròin deth.

E 'na shruthain dhearga, fhaluis,
Ach cha 'n aithnich duine sgìos air-
Leumaidh 'n t' iùil-fhear air g'a mharcaidh,
'S bad do dh' ascairt aig' ga shlìogadh:
E cho ciùin ri bò a'm buaile
'N déigh na chuala tu mu dhéighinn:
'S mar h-e so an Lebhiàtan,
Thoir an t-ainm is àill leat féin air.

LUINNEAG DO ARTT MAC LACHLUINN.

Leis an aon cheudna.

Ol a h-aon, a's òl a dhà dhiubh-
Olaibh, 's tràighibh i gu 'grunnd-
Slàint' an Lachlunnaich, an t-àrmunn,
Air an éirich dàin le sunnd.

Olaibh i le còrnaibh làna,
Deoch is làidire na liunn;
Caochan smearail, cruaidh bho 'n Tòiseach,
'S tric fo chròic a thug e dhuinn.
O la h-aon, &c.

Gur a tlachdmhor e mu bhòrdaibh,
'N uair bhios daoine còire cruinn-
Dream d'an aithne cainnt gun fhòtas
Gheibh iad 'òrain agus 'fhuinn.
Ol a h-aon, &c.

Gur h-e féin is géire focail,
'S gur maith 'eachdraidh air na suinn:

Sloinnidh e fir threuna Lachluinn
Cian air ais gu làithean Fhinn.
Ol a h-aon, &c.

[TD 92]

Tha e urramach aig Gàidheil,
'S aig na Goill ro àrd an cùirt;
Tha e caoimhneil, tha e bàigheil,
'S tha e àbhachdach mu bhùird.
Ol a h-aon, &c.

'N uair a théid e ann a éideadh,
Ann a fhéileadh preasach, grinn;
Pearsa ghaisgeil, bheothail, lòdail,
Calpa mòdhar, bòidheach, cruinn.
Ol a h-aon, &c.

Aghaidh 's flathaile fo bhoineid-
Boineid leathann, bhileach, chruinn;
'S colgarra a ghorm shùil mheallach,
Fo 'àrd mhallaigh, mholaich, chruim.
Ol a h-aon, &c.

Gur a Gàidheal e gu 'mhullach,
'S e gun uireasbhuidh gu 'bhuinn;
Ach 's e 'chridhe mòr mar Ghàidheal
Chumas 'ainm gu bràth air chuimhn'.
Ol a h-aon, &c.

'N uair a chruinnichear gu fearra-ghleus
Maithean Albainn air blàir luim,
A measg Dhiùcan agus Mharcas
Bidh Mac Lachluinn ann an suim.
Ol a h-aon, &c

'S gu mu buan a mheal e 'n t-urram-
Olaibh buileach i g'a grunn-
Slàint' an Lachlunnaich, an t-àrmunn,
Air an éirich dàin le sunnd.

CRIOCH.